

Ado Musügä Negei Gelesoea **Yonema Ulufai Amo** **Ado Dëdëi Dibe Amoïe Neala** **Olelo Oboba**

Dafidilo Geloi Yesu Gelesoma asigi afädë negei nefolalo amoli neala sëlasisa neebe amo gaalu, ema ulufala olesebegi, Yonea beba we dëdëi. Dëdëi amoïe mida, Geleso sosogo nefolalo amolia, Geleso Yesu eda ilile Dafidilo Geloi nealahilä, së naha nea, dīgila made mosäia, ili gelolasila beba we dëdëi.

Yonea beba we dëdëi weda, ea sosoäla awäla meli amoge, ema ulufala olei amoge, Geleso sosogo nefolalo amolima ea dëdëla iasissebegi, ilia mi fädäla helësëi. Gasoda, Geleso sosogo made nefolalo amoliada, made helësëi nelo. Elö elöla sosoäla awäla meli amoïege, ulufala olela nowei amoïege, galone mi afädëfali dialeala säla dëdëla negei. Galone amo hamoi amoïe mida gowe. Aligila wagamolö segeyo besela galasolo amo gala, Godeïe ado nii sulubadelage, mugabe Saidanige, Godea Dafidilo Geloi Yesu Geleso emadi aligila, nudula salolela baagila moholömelë.

Ado afädë dëdëi dibe amoda gowe. Godea udia dolöie siaholö hëla digisa maademolömelë. Amasegi, baagomolöge, gualömolöge, diimolöge, sëmolöge, made bimolömelë. Nelebo dafidi difolalo amoli hogosa helesa maadeimelëla säi. Ulufai 21.4 bimalo.

Yesu Gelesoea sesi gifalädalïagi udia dolö nefolalo amolima ado säla ïmaloi

(Ulufai 1-3)

¹ Ado goweda, Yesu Gelesoea ulufai. Ulu-fai amoda, ea ïe hamoi hamolasilo nefolalebe amolima nelebo aabela besela galamolö ga made dibegi, ea amoli ulufala olemäia, Godea ema ï. Gelesoea nelebo hamomolö amoli, ïe selesaia fii afädëa ïe hamoi hamolasilo Yone nema, ïe hamoi hamolasilo odoa nefolalebe amolima ado gowe säla ïmalola säla ïmelëla säla ïasio.

² Na nelebo amoli sulubadela siia beaha maade-lahilä, Godea ado säi amoge, Yesu Gelesoea ulufala dofäla säi amoge, na dilima ulufala säla ïahago. Nada ado amo dofämelëla säha.

³ Ado bea säi dibe gowegi odoaea nabuäia nidelo amoliage, nabala bëgëla hamolo amoliage, obeägisa neamelë. Mida, ïe segeyoda, ga madefali dialea.

*Esia segeamadi sesi gifalädalïa amolima Yonea
ado dëdëla ïasi*

⁴ Neda Yone. Na Bolobinisi Esia segeamadi sesi gifalädaliagi udia dolö nefolalebe dilima beba gowe dëdëla ïasisago.

Gode walio neebeweage, siiba nelo ameage, hobea moholö ameage, dilima ugila negelasilole dalulasilole ïmäia hamesa neawe. Amase, Godeïe sidaia ïe beaha aligilo filo dibeami aligilo gesami gifalädalïa amoliage,

⁵ Yesu Gelesoeage, dilima ugila negelasilole dalulasilole ïmäia hamesa neawe. Yesuda asigi

falagasei nea, ulufala säloge, baagoi bauiala degabo mi gäwila nowei amoge, nagadaia gini nefolalebe amolile busa neebe amoge, neamelë.

Ea nili boba hamosa nea, nilia nafade hamoi amea gide begei nebegi, ie healea nili fisigälasa.

⁶ Amase, sosogo afädë namiäia, nili neala gedolasila, nilia odala i neala ilo nea, ie Eedo Godeie hamoi hamolasilo namiäia, nili hamolasi. Amala hamolasilo amo hïma, ëi edefadeie yo digaloge geloige, iëmu diamolöi diamiäia hamesa neawe. Dofä amala hamomäiamelë.

⁷ E mu baidilidabodo maasebe godogo bimo. Udia dolö sulubadelaie siia e bimolömelë. E gögë gäwilo amoliage, e bimolömelë. Amase, udia dolö fifi asi sege sulubadelagi sefolalebe amolia e helësëla gäia güsäla diimolömelë. Dofä. Dofä amala hamomäiamelë.

⁸ Dafidilo Geloï Godea sähalea, A-ge nihï ne, Ya-ge nihï ne neawe. Ne walio neebewege, siiba nelo amoge, hobeä moholöge neamelë. Neda Sulubadelaie Geloïfalï Geloï neebela säha nea.

Yonea Yesu meli

⁹ Neda dilile didoo Yone. Nege dilige, nili gaalu Yesuie ëigi neebe ameadä, yöi gaula së naha nea, Godea Beaha Maadela Sigi Neebea ami nea, aso maadela, gelola aligisawemelë. Godea ado säi amoge, Yesuea ulufala dofäla säi amoge, na säla iäha nebegi, ilia ne gaula sege duhulu södölo Fadimoso dibeä ami galabaia negesi amea, ne ami

nelo.*

¹⁰ Amala nebegi, Dafidilo Geloïie segeyogi, Godeïe Gesami nema salugasisio. Amase amo gaalu, ne baagido ado afädë gelola uuala melo biguli goba gadoia säse nabi.

¹¹ Amo nabaha nebegi, ado amea sähalea, Dia siia beasebe egowelida, bebagi dëdëlahilä, Geleso sosogo gaamu gifalädalïa, Ebesage, Simenage, Fegamamuge, Daiadailage, Sadisige, Filadebiage, Eleodisiage nefolalebe amolima dëdëla fisiga gamalola säsio.

¹² Nema ado säsebe amo nowëa säsebelela bimölöie besuia imogoi. Besuia imogolahilä beahamelebe, elamu i gifalädalïa goloea hamoi dibe meli.

¹³ Amo beahaleamelebe, elamu i negelo dibe mogogi ami, dolö afädë dolöfä gadoi neeboo. Dolö amoda, fagulo sedade didigala gälahilä, sogobe goloea hamoi amo bidagia bobogä gäi neeboo.

¹⁴ Ìe busage, ìe busa hilìge, faleda, sugua sibi hili falele, mu baidili falele gadoi gabio. Amase, ìe siida, nulo söa gadoi gabio.

¹⁵ Ìe emo amoïe yoda, igi aeane ëi bolonosi nuli gobei neëi amo gadoi neeboo. Ìe adoda, ödä nawali guui goba gadoi nabimelë.

¹⁶ Ìe naabo dafädiada, gasumilï gifalädalïa gaula neeboo. Aso, beahaleamelebe, nudulo helebe si äüdä helegela meifalï amo, ìe nafiadila doadigila maase meli. Amase, ìe odagi yo digai amoda, eso

* **1:9:** Olomo dolö iliada, udia dolöea ilile mala dibe amo gadola made hamoseda, odoa ili gaula awäla, ödä södölogi ifosilo. Fadi-moso södölo amoda, ilile galabaia gaula awäla ifosilo sege dilo.

mogogi gelola neëlo amo gadoi neebe melimelë.

¹⁷ Na e bealahilä, ie emo mia baagola digala, baagoi gadoi dilo gabio. Amala dibegi, ie naabo dafädia ne diigisalea sähalea, Made bedämalo. Dafidilaiege ne nea, hobealaiege ne neawe.

¹⁸ Neda namolöi neawe. Neda dafidi baagoi gasoda, hä, bimo, walio neda namolöi namolö neawe. Baagoiege, uguli mosöiege, idi gai dogelo giida, na gauleamelë.

¹⁹ Amai ameada, nelebo beasego dëdësaleada, walio misi difolalebe golige, nelebo hobeä di-amolö amolige, dia dëdësa maademalo.

²⁰ Aaimo, gasumilä gifalädalä nïe naabo dafädia gaula neebe dia bease goiege, elamu i negelo goloea hamoi gifalädalä difolalebe bease goiege, galone musügä negei dilo amoda gowemelë. Gasumilä gifalädalä amolida, Geleso sosogo gaamu gifalädalägi nefolalebe amolile selesaia fii gifalädalä nea. Amase, elamu i negelo gifalädalä amolida, Geleso sosogo gaamu gifalädalägi nefolalebe amoli neamelëla säi.

2

Ebesa sesima ado gowe dëdëla i

¹ Dolö amea sähamu nea sähalea, Dia Ebesa sesigi nefolalebe amolile selesaia fii neebe amoma ado gowe dëdëla ïmo.*

* **2:1:** Geleso sosogo nefolalebe amolile selesaia fii neebe amoma ado gowe gaula mosalola säi amoda, sesi udia dolö nefolalo amolia mala hamosebe amoë amala säi. Amoëda, selesaia fii afädëfalä amea hogoli agedugige osodagige, dila säla dëdëla negei dialea.

Īe naabo dafādia gasumilī gīfalādalīa gaula, elamu i gīfalādalīa goloea hamoi dibe mogogi ami nawesa neebe amoīe adoda gowemelē.

² Mala dia hamolo amolige, hamoi baagi sēi hamosa nelo amoge, aso maadela, gelola aligilo amoge, na dawa. Dia dolō nafade hamolo nefolalebe amoli hamelo made nelo amoge, amase, dolō odoaea ilida abosolo dolōla wāfalī sālo amoli, dia ili dofā abosolo walebelela bimolōīe fedogola bealahilā, ili wāfalī sālo nelo gabula beagolei amoge, na helēsēsa.

³ Dia nīe ēi gaula neebe amea yōi gaula nea, aso maadela, gelola aligilahilā, dimamela habobala fisi made.

⁴ Amai gaso, mala afādē dia hamosegi, na made hamelo amoda gowe. Dia dafidi boba hamosa nelo fisi amogi.

⁵ Dia dafidi mala hedabi hamosa nelo amo fisila, digai nebego, bu helēsēla obēgēmo. Amaimo, asigi besulahilā, mala dafidi hamosa nelo amo gadola, bu hamola obēgēmo. Amala made besuseda, ne di neebea maala, diē elamu i negei dibeā amila nihi hailsa nimolōmelē.

⁶ Amai gasoda, dia hedabi afādē hamosa neebe amoda gowe. Nigolasa bēgēla aulo nefolalebe amolia hamolo amogi, dia habobai nebegomelē. Nage ilia amo hamolo amogi habobaimelē.

⁷ Afādēa gēhea nabalōi galēda, Godeīe Gesamia sesi amolima ado sāsebego nabualo. Afādēa nudula salolela baagila aulo neebe amomada, na namolō ilo i gāgā faila molōda, dofeala sāmōlōmelē. I amoda, Godeīe sagaia Hebeni

segea neala säi.

Simena sesima ado gowe dëdëla ï

⁸ Dolö amea sähamu nea sähalea, Dia Simena sesigi nefolalebe amolile selesaia fii neebe amoma ado gowe dëdëla ïmo.

Afädë dafidilage nea, hobealage nea, dafidi baagola nowei neebe amoïe adoda gowemelë.

⁹ Dia yöi gaula së naha nebegoge, nelebo maade nebegoge, na dawa. Amai gaso, dida yafie gelola galeamelë.* Odoaea nilida Yu sosogo neala säla, ilia di gagadela ado nafadela sälo amoda, na dawamelë. Amolida Yu sosogo made, ilida Saidanüie sosogo nefolalea.

¹⁰ Dia së molö maase amogi, bedäla made namialo. Nabuö. Mugabe busaea dili neebe gogi odoa neala, abilia hamosebelela bimolöie, galabaia negesimolö hamosebemelë. Segeyo nabülasigi, dilia së naala yösa namolömelë. Di së naala baagomolö gabugi, nie ëigi asigi falagasei neëda, na dima namolö gähe amoïe bidi amo ïmolömelë.

¹¹ Afädëa gëhea nabalöi galëda, Godeïe Gesamia sesi amolima ado säsebegu nabualo. Afädëa nudula salolela baagila aulo amoda, baagomolö agedu amoïe së dofä made molömelëla säi.

Fegamamu sesima ado gowe dëdëla ï

* **2:9:** Udia dolö Geleso sosogo Simena nefolalo amolida, domaloïeda, busadäoi nefolalo. Gaso, gesamiïeda, ilia yafie gelola dilo.

¹² Dolö amea sāhamu nea sāhalea, Dia Fegamamu sesigi nefolalebe amolile selesaia fii neebe amoma ado gowe dēdēla īmo.

Afādēa nudulo helebe si āudā helegela meifalī gaula neebe amoīe adoda gowemelē.

¹³ Di mugabe Saidaniīe beaha aligilo filo dibeā ami sebe amoda, na dawa. Gaso, dia nīe ēi fisila made, gelola gaula nea, nema asigi afādē negei amo, amo wālasi nebego. Dolō afādē asigi falaga-sei nea, ne neala ulufalo Ādibasa nelo amo, mugabe Saidani neebea ami odoaea dilile segea e baagomāia nufudasolo amo galage, dia nīe ēi amo made fisila nelomelē.

¹⁴ Amai gaso, mala dia hamosegi, odoa na made hamelo amolida gowe. Di neebea gui odoaea Balamaea mala olelei amo gaula neebe amogi. Ea Balagama olelesalea, gomalā hamomalola Isilaleīe malōea nafade hamomāia, neala digalasila hamola olelesa nelo. Molō wāfalī godegali gōa nelegela ī amo mage mosāia naala olelela digi, udia dolō susugu hamomāia olelela digisa nelo.

¹⁵ Amase, amo gadola wāla, di neebea gui odoaea Nigolasa bēgēla aulo nefolalebe amolia mala olelelo amo gaula nea.

¹⁶ Amai gabugi, asigi besumalo. Amala made hamoseda, ne fodolofalī di neebea maalahilā, nīe nafiadila nudulo helebe besela galasebe amea, udia dolō amolibalā nudumolōmelē.

¹⁷ Afādēa gēhea nabalōi galēda, Godeīe Gesamia sesi amolima ado sāsebegō nabualo. Afādēa nudula salolela baagila aulo neebe amogali, na mena musūgā negei dilo amogi

odoa muäia ïmolömelë.* Amase, na igi falei afädëgi ëi gähe dëdëla negei dilo amoge egali ïmolömelë. Ëi gähe dëdëla negei dibe amoda, odoaea made dawa neëgi, neala gause ameamu dawadigimolömelëla säi.

Daiadaila sesima ado gowe dëdëla ï

¹⁸ Dolö amea sähamu nea sähalea, Dia Daiadaila sesigi nefolalebe amolile selesaia fii neebe amoma, ado gowe dëdëla ïmo.

Godeie malö amoie adoda gowemelë. Ìe sida yo digai nulo söa gadoige, amase, ïe emoda igi aeane ëi bolonosi eleloi amo gadoige neeboo.

¹⁹ Dia mala hamolo amoge, odoa boba hamolo amoge, asigi afädë negelo amoge, odoa ugila negela hamoi hamolo amoge, aso maadela, gelola aligilo amoge, na dawa. Amase, dia walio hamoi hamosa nebegoea, dafidi hamosa nelo amo baagila awäla hamosa nebegoge, na dawamelë.

²⁰ Amai gaso, mala afädë dia hamosegi na made hamelo amoda gowe. Udia Yesebele hi, neda bea sälo saleawela säsebe amo, dia made dofogalo amogi. Ea mala olelese ameadä, nie hamoi hamolasilo nefolalebe amolia susugu hamomäiage, molö wäfalï godegali göa nelegela

* **2:17:** Mena amoda Isilale udia dolö ili sege falaigi afiaha dibegi, Godea iligali muäia ï amo. Sigi Obëgëi 16ge; Gë Udälo 78.24ge bimalo.

ï amo muäiage, ili sigi gaula asiala aulo salea.*

²¹ Ea dolö susugu hamosa neebe amoë, e asigi besumäia fu ï gaso, amo made hamelo salea.

²² Hä, nabuö. Na e neala ololasisegi, e imididaia fugaulasi diamolömelë. Amase, dolö ebalä susugu hamolo amoliage, ïe mala nafade amo baagi ïala asigi made besuseda, ilige së edefademalä naha namiäia ïmolömelë.

²³ Udia amoë malö amolige baagomäia nufolömelë. Ameada, sesi sulubadelaë, na udia dolöea helësësa dibe amoge, hamesa dibe amoge, hogola dawadigisa maadesebela helësëmolömelë. Nada dili hïdo hïdolaëa hamosa nelo amo gadola bidi ïmolömelë.

²⁴ Amaimo, Daiadaila nefolalebe odoä dilia, udia amea mala olelelo amo made bögëla, mugabe Saidanië mala musügä negei dialeala sälo amogi dawa made neebe dili sulubadelama gomälä säla ïahago. Yöi odoä gaula namiäia made ïala,

²⁵ na gowemu sähago. Ne obögëla misiäia beaha nebego gaalu, nelebo gaula nebego fëdöla gaula namialola sähago.

²⁶ Amala hamosa nea, afädëa nudula salolela baagila awäla, na hamese amo gadola hamosa neamu hamola wagase amogali, gädili elö elölagi udia dolö nefolalebe amoli sigi namölö geloi

* **2:20:** Ëi Yesebele amoda, udia nafade afädë siiba Isilaleie gini udia sulo. Age Gini 18.4ge; 19.1-2ge; 21.1-26ge; Agedu Gini 9.22ge, 9.30-37ge, bimalo. Odoäea helësësalea, udia afädë Nigolasa bögëla aulo ameada, Daiadaila udia dolö odoä nealahilä, ea nafade hamosebe amo gadola hamomäiaë, dusugala gaula awäha nelo. Ea amala hamolo amoë, ïe ëi Yesebelela säila helësëi.

amo ïmolömelë.

²⁷ Ea udia dolö amoli aeane baialaea beaha aligimolömelë.

Ödä i nagea hamoi difolalegi dusudasilo amo gadola, ili dusudasimolömelë. *Gë*

Udälo 2.9

Naadoea geloi nema i amo gadola wäla ïmolömelë.

²⁸ Amase elöda, sege yose gaalu gasumili dagäsiögöla neë besela galalo amoge ïmolömelë.

²⁹ Afädëa gëhea nabalöi galëda, Godeie Gesamia sesi amolima ado säsebegö nabualola säi.

3

Sadisi sesima ado gowe dëdëla i

¹ Dolö amea sähamu nea sähalea, Dia Sadisi sesigi nefolalebe amolile selesaia fii neebe amoma ado gowe dëdëla ïmo.

Afädëa Godeie gesami gifalädaliage, gasumili gifalädaliage gaula neebe amoie adoda gowemelë. Mala dia hamolo amolida, na dawa. Odoaea di helësëla sähalea, Eda baagoi made, saleala sälo gaso, ai, dida baagoi nebegö.

² Amaï gabugi, di adi dibegö nowemo. Na beaseda, dia mala hamosegö nie Godeie siigi made hamola wagai beasebe ameada, nelebo gaula nebegö made baagola dibegögi wäla, gelomalo.

³ Dia dafidi ado nabala neala gaui amo, bu helësëla obëgëmalo. Ado amo bëgëla hamolahilä, asigi besumalo. Di adi dibegö made noweseda, ne fa nelo musügä mulo amo gadola moholömelë. Ne di sebea gowe gala moholölada, dia dofä made helësëmolömelë.

⁴ Gaso, di Sadisi gaamugi nebegogi, afädë afädëlaïe fagulogi nigime baai made neamelë. Amolida, hä, dofea neebe ameada, fagulo falei salugalahilä, nebalä nawesa namolömelë.

⁵ Amase, afädëa nudula salolela baagila aulo amoge, fagulo falei amo gadoïmu salugamolömelë. Ìe ëi namolöi namolö bebagi dëdëla negei dibe amoda, na dofä made hëla, nïe Naadoge ìe selesaia fiige neebea ami nea, ìe ëi säla ulufamolömelë.

⁶ Afädëa gëhea nabolöi galëda, Godeïe Gesamia sesi amolima ado säsebegö nabualola säi.

Filadebia sesima ado gowe dëdëla ì

⁷ Dolö amea sähamu nea sähalea, Dia Filadebia sesigi nefolalebe amolile selesaia fii neebe amoma ado gowe dëdëla ìmo.

Afädë eleloige dofäge neebe amoïe adoda gowemelë. Ea Debidiïe idi gai dogelo gii gaula nea, dogä negese amoda, afädëa made gamolö. Amase, gase amoda, afädëa made dugi-molömelë.

⁸ Mala dia hamolo amolida, na dawa. Bimo. Na dïe odagido idi dogä negesi afädë dialea. Idi amoda, afädëa gamolö ulïmelë. Dïe geloida holöfalï neebe amoge, na dawa. Amaha gaso, nïe ado bëgëla hamola, nïe ëi baagi made ì.

⁹ Hä, nabuö. Na udia dolö mugabe Saidani sosogo amolida, di neebea maala, dïe emo mia gumusula dia didigafulasisegi, ilia na di boba hamolo gabula helësëmolömelë. Iliä nilïda Yu sosogo neala sälo amoda, dofä made, wäfalï sälo.

¹⁰ Na dima aso maadela, gelola aligimalola săi amo gadola bēgēla hamosa nelo amoē, nagadaia nefolalebe amoli sulubadela fedogola bimolōie sege sulubadelagi neala sēlasimolō elō elōla maa-solo amo gala, na di sigi namolōmelē.

¹¹ Ne moholō amoda, ga made gabumelē. Salolei amoē bidi dia nimolō amo elōea fedela neloea, dia nelebo gaula nebego hedabola fēdōla gaula namialo.

¹² Afādēa nudula salolela baagila aulo neebe amoda, nīe Godeie mosō igau namiāia, na neala ifosimolōmelē. Eda doadigila made moholō. Na nīe Godeie ēige, nīe Godeie gaamu gāhe amoē ēige, amoma dēdēmolō. Gaamu amoda, Yalusaleme gāhe, selesaia mosōala nīe Gode nee-beala digamolō amomelē. Amase, nihīle ēi gāhege ema dēdēmolōmelē.

¹³ Afādēa gēhea nabulōi galēda, Godeie Gesamia sesi amolima ado sāsēbego nabualola săi.

Eleodisia sesima ado gowe dēdēla ī

¹⁴ Dolō amea sāhamu nea sāhalea, Dia Eleodisia sesigi nefolalebe amolile selesaia fii neebe amoma ado gowe dēdēla īmo.

Afādēa amala hamomāiala sālō amo, asigi falagaseige dofāge nea sālā ulufalo amo, īe aulodaiāla Godea sulubadela hamosa maadei amo, īe adoda gowemelē.

¹⁵ Mala dia hamolo amolida, na dawa. Di walio gōgī madege, hēgī madege nebegoda, na dawa. Di hēgī namolō galēge, gōgī namolō galēge, gelola afādēgi namiāia hamesa.

¹⁶ Di hēgi maade, gögi maade gumiäi goeada, na dida nīe nafiadila isola salimolö hamosebe-melē.

¹⁷ Dia sähalea, Neda nelegei yafie negelo dafidilo dolö. Nelebo dibe amo gadoida, negesa maadei nea. Nema nelebo gumusuida, maadela säha neamelē. Amala säha neago gaso, dida asigi säosäoige, dofä bobasēi gadoige nebegoda, dihi dawa made nebego. Amase, nelebo maade, dudugimu, si golaige nebegoda, dihi dawa made nebego.*

¹⁸ Amai gabugi, dia hamomäia na helēsēlasila sähago. Di nelegei yafie negelo dafidilo dolö namolöie, nemadi nea golo nigime baai nulogi hedabomäia gobei amo bidia nimalo. Amomu made, di dudugimu neë, udia dolöea beasegi made hewamolöie, fagulo falei dibe amoge, bidia neala salugamalo. Amase, die siia bu bimolöie, maleseni siigi negemolöie, bidia neala hēmalo.

¹⁹ Na boba hamose amolida, nemolahilä mala säla hamogilomelē. Amalo gabugi, hamoi hedabi hamomolö amo gelola hamesa nea, asigi besumo.

²⁰ Nabuö. Ne idi galo baagido nea, nufigisa nea uuaha neawe. Afädēa nīe ado nabala, idi gai amo doga negeseda, ne nogila digala, nege ebalä molö nadigi, eege nebalä nadigila, haligila molö molömelē.

²¹ Amaimo, na nudula salolela baagila awälahilä, nīe Naadoie beaha aligilo filo dibeami ebalä gedola sulo amo gadola, afädēa

* **3:17:** Eleodisia hilile siiada, ilida nelebo yafie negei gadoi gaso, Godeie siiada, ili busadäoi melēlo. Ulufai 2.9gi dibe amo bimalo.

nudula salolela baagila aulo neebe amoda,
nïe beaha aligilo filo dibeami nebalä gedola
samolöie, fu ïmolömelë.

²² Afädëa gëhea nabulöi galëda, Godeie
Gesamia sesi amolima ado säsebegö nabualola
säi.

**Sugua Sibi Malö amea selesaia
mosöa beba afädë hogase gaalu,
nelebo yöi nafade amoli nagadaia
udia dolöma besela galasio**

4

(Ulufai 4-11)

*Selesaia mosöa nefolalebe amolia Godeie ëi
gauia adala säi*

¹ Wae! Ado amoli säha maadeibua, na bea-
hamelebe, selesaia mosöa idi galo afädë dogä
negei dibe meli. Amo bease amo gaalu, ado
afädë melo biguli gadoi dafidi säse nabi amea,
nema sähalea, Hobeä hamomolö dibe amo na dima
oledelä, di ne neebeawi fedamola säsiö.

² Amala säha neebe amo gaalu, Godeie Gesami e
nema salugasisio. Wae! Amala hamose amo gaalu
na beahamelebe, selesaia mosöa ami beaha aligilo
filo dibeo. Amodaia dolö afädë sebe meli.*

* **4:2:** Yonea beaha aligilo filodaia dolö afädë sebe meli amoda,
Gode e. Gasoda, Yone eada Gode melimelëla ulufala made säi. Ea
hobeala hogoli 7 damo 10gida, ea ulufala Gode eda gini filodaia
sebeola säi. Yoneada, Gode eda dolö gadoi gabiola made säi. Ea
Gode eda, yo digalo edefadelage, gala elö elölama oodo beala bigisia
hamola säi.

³ Filodaia sebe amo elelolo igi folomoi ëi yasabale, igi bëi ëi ganelianale gadoi sebeo. Beaha aligilo filo amoda, soläilo sagai igi i bäu gähe gadoi ëi emelalo gadoia amalela digi dibe meli.

⁴ Beaha aligilo filo dibe amo mogogi nege-siä, sigi aligilo filo nabülasi äudäie odoai biyidia nogöla amalei dibeami, dolö asigi gäwi dafidilo nabülasi äudäie odoai biyidiaea fagulo faleimu salugalahilä, ilile busagia beaha aligiloie habuga goloea hamoi amo salugala, amolidaia sefolalebeo.

⁵ Beaha aligilo filo dibeami, sege yabagelelage, goba hïdo elöige, hahalä edefade dagabolage, goba maase nabi. Filo dibe amoie odagiamadi, gamali goli gifalädaliagi yola negei dibeo. Amolida, Godeie gesami gifalädalia amoli gabio.

⁶ Amase, beaha aligilo filo dibe amoie odagiamadida, ödä duhulu gadoige ulufala bimolöi galasi hahaloigadoi dibeo.

Hä, mogogi ami, beaha aligilo filo amo nogöla amalela, namolö aligi biyidia amoli nefolalebeo. Ilile odagidoge, baagidoge siimu aligila amalela digi nefolalebeo.

⁷ Namolö aligi age amoda, ilua ügülo ëi elaeonogadoi neeboo. Agedu amoda, sugua gao gawali gadoi neeboo. Osoda amoie odagida, dolö odagigadoi gabio. Amase, biyidu amoda, haea sädia hagila nawese amo gadoi neeboo.

⁸ Namolö aligi biyidia amoli sulubadela hïdo hïdolama augia gafeia aligi nea, ilile domalo sulubadelagige, augia hawage, siimu aligisa maadei neeboo. Ilia yoba gasigige, hele aligila made, sähalea,

Dafidilo Geloi Gode, Sulubadelaïe Geloifali Geloi
 neebe amoda eleloi, eda eleloi, eda eleloi nea.
 Eda siiba nelo amoge, walio neebewege, hobe
 moholö amogela

sāhamu neeboo.

⁹ Namolö aligi biyidia amolia beaha aligilo filo-
 daia salea, namolöi namolö neebe amoïe ñi gauia
 adogola, ema ñi sālō nealage, nesegelege sāsolo
 amo galada,

¹⁰ dolö asigi gāwi dafidilo nabūlasi āudāïe odoai
 biyidia amolia beaha aligilo filodaia sebe amoïe
 odagido, gumusula dia didigafulahilā, namolöi
 namolö neebe amoïe ñi gauia adahamu aligilo
 gabio. Ilile beaha aligiloïe habuga goloea hamoi
 amoli giilahilā, ñe beaha aligilo filo odagido sadia
 idogolahilā sāhalea,

¹¹ Nilile Gode Dafidilo Geloi-e,
 dia nelebo sulubadela hamosa maadei
 amea,
 dia nelebo sulubadela diamiaia samiaia
 namiāiala helēsēi amea,
 dia amala hamei amea nelebo sulubadela
 hamosa maadei ameada,
 nilia dñe ñi gauia adogomolöge,
 dima ñi sālola sāmölöge,
 dida geloi neala sāmölöge,
 diemu negesidelā di dofea nebego.
 Amolida, dñe negesimolöi galeala sāha
 neeboo.

5

Yonea beba afädē meli

¹ Amase, na beahaleamelebe, afädē beaha alig-
 ilo filo dibeā ami sebe amoïe naabo dafädia beba

meöi afädë ba näiadoge näiadoge dëdësa maadei gaula sebe meli. Beba amo made fisigämäia, i heale gadoi gifalädalïaea baalahilä, alägädila nofela negei gabio.

² Amo beaha nebegi, selesaia fii geloi afädëa gelola uuala sähalea, Beba meöi go i heale gadoia baala alägädila nofela negei dibe amoli neadigila, fisigämolö dolö dofeada, nowëaduola säse nabi.

³ Gaso, selesaia mosöa nefolalebe amoligige, nagadaia nefolalebe amoligige, naga föi hawa nefolalebe amoligige, beba amo fisigäla bimolö dofeada, afädë maade gabio.

⁴ Beba amo fisigäla bimolö dofeada, afädë made beagolei amogi, na edefademalä diisa nelomelë.

⁵ Amasebegi, dolö asigi gäwi dafidilo amoligi, afädëa nema sähalea, Dia diimabu. Nabuö! Fii Yuda sosogomadi ilua ügülo gadoi ëi elaeono amoda, Debidië yaua mäumadila dulu fedala nudula sa-lolela baagila asi neebe amea, beba i heale gadoi gifalädalïaea alägädila nofela negei dibego neadig-ilahilä, beba amo fisigämolöida, e neamelëla säsio.

Yonea Sugua Sibi Malö meli

⁶ Na beahaleamelebe, Sugua Sibi Malö afädë neeboo. Amoda, ilia baagomäia nufi amo gadoi gabio. Eda beaha aligilo filo mogogi nebegi, namolö aligi biyidia amoliage, dolö asigi gäwi dafidilo amoliage, e amalela nogöla digila neeboo. Emada bese gifalädaliage, si gifalädaliage neeboo. Si gifalädalïa amolida, Godea ïe gesami gifalädalïa sege dibe sulubadelagi fisiga gai amoli gabio.

⁷ Hä, Sugua Sibi Malö amea awälahilä, afädë beaha aligilo flodaia sebe amoë naabo dafädia beba meöi gaula sebe amo neasio.

⁸ Ea beba amo neala gaula nebegi, namolö aligi biyidia amoliage, dolö asigi gäwi dafidilo nabülasi äudäie odoi biyidia amoliage, Sugua Sibi Malö amo mia, gumusula dia didigafusio. Ili afädë afädëlaea gida gadoige, falo goloea hamoi amogi i heale höba gafisigä hedabi baëla fedamäia gobelo amea nobai amoge, gaula dia didigafui difolale-beo. I heale gobelo amoda, Godeie udia dolöea Godema adose amo gabio.

⁹ Iliä gë gähe afädë udähalea,
Beba amo neala gaula nea-aaa,
i heale gadoia baala alägädila nofela negei
dibe amo neadigimolö dofeada-aaa,
dihidi nebego-ooo.

Mida, di baagomäia nufi ameage-eee,
fii sulubadelagilage-eee,
ado sälo sulubadelagilage-eee,
gädili sulubadelagilage-eee,
gafodo elö elöi sulubadelagilage-eee,
die healea udia dolö Godeie namiäia nii ameage-eee,

¹⁰ amase, sosogo afädë namiäia, dia bidia nii amoli
neala gedolasila-aaa,
ili odala i neala ilo nea-aaa,
nilile Godeie hamoi hamolasilo namiäia
hamolasisebegi-iii,
ilida naga föidaia beaha aligilo namolö
ameage-eee,
dihidi dofea nebego-ooola
säla udäsio.

Ilia Sugua Sibi Malö amoë ëi gauia adogoi

¹¹ Na aso, bu beaha nebegi, selesaia fii nide-molö asusugai yafiea, ado säse amo nabi. Selesaia fii amoliada, beaha aligilo filoge, namolö aligi biyidia amolige, dolö asigi gäwi dafidilo amolige, nogöla amalela digilahilä,

¹² gë gelola udäha nea sähalea,
Sugua Sibi Malö baagomäia nufi amoma-aaa,
sigi namolö geloige-eee,
nelebo hedabige-eee,
asigi falagaseige-eee,
geloige-eee,
ïmolö amoda dofea-aaa.

Ëi sälo namolöge-eee,
ëi gauia adogomolöge-eee,
hedabifalïmu hamolola sämolöge-eee,
hï ema ïmolö amoda dofea-aaala
säla udäsio.

¹³ Na aso, nalabosa nebegi, Godea hamola ifosisi, selesaia mosöage, nagadaiage, naga föi hawage, ödä duhulugige, nelebo sege amoligi dibe neebe sebe amoli sulubadelaea gë udäha nea sähalea,

Afädë beaha aligilo filodaia sebe amomage-eee,
Sugua Sibi Malö neebe amomage-eee,
hedabifalïmu hamolola sämolöge-eee,
ëi sälo namolöge-eee,
ëi gauia adogomolöge-eee,
sigi namolö geloige-eee,
ïemu diamolöi diamiäiamelë-eeela
säla udäha dibeo.

¹⁴ Amala säha dibegi, namolö aligi biyidia amolia sähalea, Dofä amala hamomäiamelëla säha.

Amase, dolö asigi gäwi dafidilo amolia gumusula dia didigafulahilä, elele ëi gauia adogosa neeboo.

6

Sugua Sibi Malöea i heale gadoia baala alägädila nofela negei dibe amoli hogai

¹ Na beahamelebe, Sugua Sibi Malö amea i heale gadoi gifalädaliäea baala alägädila nofela negei dibe amoligi, afädë amo hogasio. Amo hogase amo gaalu nabelebe, namolö aligi biyidia amoligi, afädëa hahalä dagabolo amo gadola wäla sähalea, Misiëla säsio.

² Wae! Amala säse amo gaalu, na bu beahamelebe, sugua hosi falei afädë neeboo. Amodaia fila aulo dolö afädë dadi gaula sebeo. Amoma ilia nudula salolelo habuga iäsebegi, e nudula salolelo nea, odoage nudula salolela baagila moholöë fila awäsio.

³ Amalahilä, Sugua Sibi Malö amea i heale gadoia baala alägädila nofela negei dibe amoligi, agedu amo hogasio. Amo hogase amo gaalu nabelebe, namolö aligi biyidia amoligi, agedu amea, Misiëla säsio.

⁴ Amo gaalu, sugua hosi afädë fedala aligisio. Amoda bëi nulo söa gadoi gabio. Ila amodaia fila aulo dolö amoma nagadaia dalulo mala neadigila, udia dolöea hilimu nudusa namiäiaie geloi iasio. Amase, ilia nudulo helebe edefade afädëge ema iasio.

⁵ Amalahilä, Sugua Sibi Malö amea i heale gadoia baala alägädila nofela negei dibe amoligi, osoda amo hogasio. Amo hogase amo gaalu nabelebe, namolö aligi biyidia amoligi, osoda

amea, Misiëla säsio. Wae! Amala säse amo gaalu, na bu beahamelebe, sugua hosi yabui afädë nee-beo. Amodaia fila aulo dolö amea yöi dofela melëlo afädë ie naaboea gaula nee-beo.

⁶ Na amo bealahilä, namolö aligi biyidia nee-bea amila ado gadoi nabaha nebegi, ado amo gomälä säsio. Segeyo afädëgi hamoi hamola bidi nelo amea, eladi gadoi ëi widida, yöi gilo afädë gadoi nimolö dialea. Amase, segeyo afädëgi hamoi hamola bidi nelo amea, eladi gadoi ëi balida, yöi gilo ohodoa gadoi nimolö dialea. Amaimo, i gägä negelo ëi olibege, ëfë gägä negelo ëi gelebigi, neala nafademabiola säsio.*

⁷ Amalahilä, Sugua Sibi Malö amea i heale gadoia baala alägädila nofela negei dibe amoligi, biyidu amo hogasio. Amo hogase amo gaalu nabelebe, namolö aligi amoligi, biyidu amea, Misiëla säsio.

⁸ Wae! Amala säse amo gaalu bu beahamelebe, sugua hosi folomoi afädë nee-beo. Amodaia fila aulo dolö neebe amoie ëida Baago. Uguli mosö ameada, Baago bögëla maasio. Udia dolö sulubadela biyidiala nofela mogelahilä, biyidu amoie neebe amolida, nudulo helebeage, sidëage, oloeage, nagadaia sugua ilaba elö elölaeage, nufudala baagomäia, elema geloi iasio.

⁹ Amalahilä, Sugua Sibi Malö amea i heale gadoia baala alägädila nofela negei dibe amoligi, bi amo hogasio. Amo hogase amo gaalu na beahamelebe, udia dolö Godeie ado mala gelola gaula

* **6:6:** Udia dolöea eladi gadoi widige balige bidi neahaleada, odoa nimäia mogela ilo. Ameada, dolö hosidaia fise amea, yöi dofela melëlo afädë gaula nee-beo.

nea, ulufala sāla iāha nebegi, dolōea nufi amolile gesami amoli odala ilo auli hawa nefolalebeo.

¹⁰ Baagoi gesami amolia gelola uuala sähalea, Busa Dafidilo Geloī-e, eleloige, dofäge di nebego. Udia dolō nagadaia nefolalebe amolimada, dia gudilahilä, nilile heale digai amoie ilima sē mogola imolō dibe amo gadola, abodo gala imolō gabula uuala säsio.

¹¹ Amala säsebegi, ilia ili hido hīdolagali fagulo sedade falei salugamāia iālahilä, ilima sāla obөгәsalea, Dilibalä hamoi gaalu afädēdi hamolasilo, didoo dialifilali, dili nufi amo gadola wāla, ilige nufudala baagomolō näba Godea daiai amo gadola gausiala digamāia, dilida aumala, aso, holōfalī beaha namialola säsio.

¹² Amalahilä, na bu beahamelebe, Sugua Sibi Malō amea i heale gadoia baala alägädila nofela negei dibe amoligi, gafe amo hogasio. Amo hogase amo gaalu, fogoli edefade gelola maala, esoda öhoeo hilī yabuia adu asi yabui amo gadoia yabulahilä, aubege sulubadela bēla heale uusa maadesio.

¹³ Äfäeo gägä, aso, galu diēgi, fo gelola maahalea faila hēsōlo amo gadola, gasumilī mudaiala nagadaia besela didigafulahilä,

¹⁴ mu giwi amo meōla galila nigia gasio. Segebi sulubadelage, ödä södōlo amoli sulubadelage, diloa amila gasi awäsio.

¹⁵ Amala hamose amo gaalu, nagadaiaie ginige, gamane beaha aligiloge, ami beaha aligiloge, nelegei yafie negelo dafidilo dolō amolige, geloi edefade amolige, galabaia hamoi gadoi hamolasilo sulubadelage, odoaie hamoi made hamo-

lasilo fisigäi nefolalebe sulubadelage, awäla igi äbägige, segebidaia igi boboga neebe amoli hawa amige, musügä fisa maadeimelë.

¹⁶ Amala musügä salea, segebi difolalebe amolimage, igi boboga nefolalebe amolimage, uuala säia adogosalea, Afädë beaha aligilo filodaia sebe amoë siia nili melëloeage, Sugua Sibi Malöea nilima mihaläla së iloeage, nilidaia dagabola digala hagumo.

¹⁷ Mida, elele mihalälo segeyo edefade, hä, misi dibe amogi, nowë namolöduola säσιο. *Hosea 10.8; Ulugu 23.30*

7

*Isilale udia dolö dausinimu hädali afädëie nabülas biyidiaie odoai biyidia odagia magi negei**

¹ Amala säsebegi, na beahamelebe, selesaia fii biyidia naga föi sulubadelaie fäfü biyidiagi nea, fo biyidiaea naga föigi fuulo amolia, nagadaia-madige, ödä duhulumadige, i nefolalebeamadige made mosäia, gaula neeboo.

² Amase, na beahaleamelebe, selesaia fii elö eso maasidola fedala, Gode namolöi neebe amoë magi negelo gaula, maaha neeboo. Selesaia fii biyidia amolia naga föige, ödä duhuluge neala nafademäia, Godea geloi i amolima, selesaia fii elöea ado gelola säia gahalea,

³ Udia dolö nilile Godeie hamoi hamolasilo nefolalebe amolile odagia, nilia dafidi Godeie magi-dale negedelä, dilia naga föige, ödä duhuluge, iige, neala nafademabiola säσιο.

* 7:: Ado busa, 4 Näba säi amoda, 144,000.

⁴ Magi negesa maadelahilä, magi negei amolile näba säla iase nabi. Näba amoda, dausinimu hädali afädëie nabülası biyidiaie odoai biyidiala säse nabi. Amolida, Isilale sosogo amoli sulubadelagila gabio.*

⁵ Yuda sosogomadilada, dausini giwilasi magi negesio.* Amase,

Ulubenimadilage dausini giwilasi,
Gadamadilage dausini giwilasi,

⁶ Asamadilage dausini giwilasi,
Nafadalimadilage dausini giwilasi,
Manasamadilage dausini giwilasi,

⁷ Simeonomadilage dausini giwilasi,
Ilibaimadilage dausini giwilasi,
Isagalamadilage dausini giwilasi, amase,

⁸ Sebulunimadilage dausini giwilasi,
Yosebemadilage dausini giwilasi,
Bëyaminimadilage dausini giwilasimu,
magi negesa maadesio.

Udia dolö sämolö asusugaia Godeie ei gauia adogoi

⁹ Wae! Amo baagia na beahamelebe, udia dolö sämolö asusugai gafodo elö elöi sulubadelagilage, fii sulubadelagilage, gädili sulubadelagilage, ado sälo sulubadelagilage, gegedoi neebeo. Ilida, fagulo falei sedade salugalahilä, waibo bäu gadoi damula gagaula, beaha aligilo filo amoie odagiamadige, Sugua Sibi Malö amoie odagidoge, nowela nefolalebeo.

¹⁰ Amala nefolalea, ilia gelola uuala sähalea,

* **7:5:** Näba säi amoda, 12,000.

Nili damula moholöda, nilile Gode beaha aligilo filodaia sebe amomadilage, Sugua Sibi Malö neebe amomadilage mulo gabiola säha nefolalebeo.

¹¹ Selesaia fii amoli sulubadelaea beaha aligilo filo dibe amoge, dolö asigi gäwi dafidilo amolige, namolö aligi biyidia amolige, nogöla amalela nefolalea, beaha aligilo filo dibe amoie odagido gumusula dia didigafulahilä, Godeie ei gauia adogola

¹² sähalea,

Dofä amala hamomäia. Nilile Godema
hedabifalimu hamolola sämolöge,
ei gauia adogomolöge,
asigi falagaseige,
nese gemolöge, amase,
ei sälo namolöge,
sigi namolö geloige,
geloifalige,

iemu diamolöi diamiäia.

Dofä amala hamomäiala sähala
säha dibeo.

Sosogo amolia së naha nelo amoda, hä, wagai

¹³ Amala säse amo gaalu, dolö asigi gäwi dafidilo amoligi, afädëa nema nabahalea, Fagulo falei didigala salugai nefolalebe egowelida nowë. Golida abidila misi nefolaleala nabasio.

¹⁴ Amala nabasebegi, na säla obëgësalea, Dafidilo, dihi dawamelëla säla obëgëi. Amala säla obëgësebegi, ea nema sähalea, Egowelida, yoi edefade elö elöla yafie dibe amila doadigila misi nefolaleagomelë. Egoweliada ilile fagulo sedade Sugua Sibi Malö amoie healea hësa

nea, fagulo amolida, falesa maadei, amoli misi nefolaleagomelë.

¹⁵ Amala hamoi ameadā, Godeie beaha aligilo filo amoie odagido nea, ilia gasi segeyo sulubadelagi, ie mosoa ami nea, ie hamoi hamolasisamu aligilo neeboo. Amase, beaha aligilo filodaia sebe ameadā, ili sigi namolömelë.

¹⁶ Ili sidëa bu elö made baagola, ödäge bu elö made halämolö gabio. Amase, esoea made hëgila, nelebo hëgilo dibe odoaeage, ili dofä made hëgimolö gabio.

¹⁷ Mida, Sugua Sibi Malö beaha aligilo filo mogogi neebe amea, sugua sibi sigi aligilo amo gadola, ilile sigi aligilo namolömelë. Ea ili namolö ilo ödä gü dibeā ami sigi awäsegi, Godea ilile siaholö hëla digisa maademolömelëla säσιο.

8

Beba i heale gadoia baala alägädila nofela negei dibe amoligi, gifalädalü amo hogasio

¹ Sugua Sibi Malö amea i heale gadoia baala alägädila nofela negei dibe amoligi, gifalädalü amo hogasebegi, selesaia mosoa ado afädë made adola, sau sagala neamu, molö gobei deala molöi gadoi hamosio.

² Amala hamose amo gaalu, na beahamelebe, selesaia fii gifalädalä Godeie odagia aligilo amolima melo biguli gifalädalä iasio.

³ Amase, selesaia fii elö odala ilo auli dibeā ami maala neeboo. Eada falo goloea hamoi i heale höba gafisigä hedabi baëla fedamäia gobelo amo gaula neeboo. Amala nebegi, beaha aligilo filo dibe amoie odagiamadi, ea odala ilo auli goloea

hamoi dibedaia gobemäiaäe, i heale gafisigä hedabi yafie ema äasio. I heale amo gobese höba amola, Godeie udia dolö sulubadelaea ema adose amola, gedolahilä fedamäia äasio.

⁴ Selesaia fii falo goloea hamoi ie naaboea gaula neebe amodaia, i heale amo gobese höba amola, Godeie udia dolöea Godema adose amola, Gode neebea gadogo fedasio.

⁵ Amalahilä, selesaia fii amea falo gaula neebe amogi, odala ilo auli dibeami nulo gobei dibe amo dea salala nobalahilä, nagadaia sadia idogoso. Amala sadia idogosebegi, hahalä edefade dagabolage, goba hido elöige, sege yabagelelage, fogolige maasio.

Selesaia fii biyidiaea melo biguli amoli fuusio

⁶ Hä, selesaia fii gifalädalä amolia melo biguli gifalädalä gaula nefolalo amea fuumolöe, dadaiala aligisio.

⁷ Selesaia fii amoligi, age amea melo biguli amo fuuse amo gaalu, sege gägäge, nulo healebalä gegoalage, nagadaia sadia idogoso. Amala hamoi ameadä, sege sulubadela ohodoala mogelahilä, osoda amoie nagage iige, amase, giisi sulubadelage, wisa maadesio.

⁸ Amasebegi, selesaia fii agedu amea melo biguli amo fuuse amo gaalu, nelebo afädä segebi edefade wilo amo gadoi duhulugi sadia idogoso. Duhulu amo ohodoala mogelahilä, osoda amo heale uula besela galasio.

⁹ Duhulugi hamola ifosisi sefolalo amoli ohodoala mogelahilä, osoda amo baagosa maadesio. Amase, ödä sibi duhulugi aulo amolige,

ohodoala mogelahilä, osoda amo nafadesa maadesio.

¹⁰ Amasebegi, selesaia fii osoda amea melo biguli amo fuuse amo gaalu, gasumilä edefade gele wai yo gadoi, mudaiala digala, ödä afufui dibe amogige, ödä gü besela galasebea amige, sulubadela ohodoala mogelahilä, osoda amogi digasio.

¹¹ Gasumilä amoë ëida, Gamogai Nafade. Ödä sulubadela ohodoala mogelahilä, osoda amo gamogaha maadesio. Udia dolö yafiea ödä gamogai amo nase amolida, baagosa maadesio.

¹² Amasebegi, selesaia fii biyidu amea melo biguli amo fuuse amo gaalu, eso ohodoala mogela digi, aube ohodoala mogela digi, gasumilä sulubadela ohodoala mogela digilahilä, osoda amo nufudasio. Ameada, osoda amolile yo amoda, usisa maadesio. Amai ameada, yoba ohodoala mogelahilä, osoda amoë yoda, maade gabio. Amase, gasige amo gadola wäla dibeo.

¹³ Amala hamosebegi, na beaha nea nabelebe, haea sädia gadoi afädë mudabodo nawesa nea, gelola uuala sähalea, Ae! Asigii gabu. Selesaia fii ohodoa amolia melo biguli odoo fuumolö hamosebe amogi, udia dolö nagadaia nefolalebe amoli asigii gabula säσιο.

9

Selesaia fii bi amea melo biguli amo fuusio

¹ Amalahilä, selesaia fii bi amea melo biguli amo fuuse amo gaalu, na beahamelebe, gasumilä afädë mudaiala nagadaia besela digai dibe meli.

Gasumilī amoma sege uli nafade mia made dibe amoie idi gai dogelo gii iasio.

² Amalahilā, gasumilī amea sege uli nafade mia made dibe amoie idi gai doge negese amo gaalu, hōba bugu edefade uli amogila nulo edefade wisalea, hōba bugu edefade fedalo amo gadola, hōba bugusio. Sege uli dibe amila hōba fedai amea esoge muge usulasebegi, yo dilo amo usisio.

³ Amalahilā, galiawa gadoi yafie hōba bugu amogila nagadaia digafusio. Nagadaia hamabuluie geloi amo gadoi galiawa amolima iasio.

⁴ Galiawa amolima sāla iahalea, Dilia giisige, iige, nelebo odoa nagadaia bāui amolige, neala nafademabio. Udia dolōie odagia Godeie magi maade amolimu neala nafademalola sāsio.

⁵ Ili nufudala baagomāia geloi made iāla, aube biagi sēsa namiāia sē edefade imolōie geloi iasio. Sē amoda, hamabuluea dolō mihi sēlo amo gadoi.

⁶ Segeyo amoligi, udia dolō amolia baagomolōie idi hogomolō gaso, dofā made beagolemolōmelē. Ili ili baagomolō edefademalā helēsēmolō gaso, baagoeada, ili neebee amila fisāla moholōmelē.

⁷ Na beahaleamelebe, galiawa gadoi amoli sugua hōsia nudumolōie daiala aligilo amo gadola neebee. Ilile busagia nudula salolelo habuga goloea hamoi gālo amo gadola gālahilā, ilile odagida, dolōie odagi gadoi gabio.

⁸ Ilile busa hilida, udia busa hili gadoi, amase, ilile bese amoda, ilua ügülo elaeonoie bese gadoi gabio.

⁹ Ili nudusalea, bidagia salugalo gadoi aeanea hamoi amo gālahilā, ili hagila awāhalea, augia goba amoda, sugua hosi yafie nudumolōie galo gadoi

dusugala gaula awähalea goba aulo amo gadoi gabio.

¹⁰ Ilile gobeda, hamabulu gobe gadoi gabio, amase, mihiloda, hamabuluea mihilo amo gadoi neeboo. Udia dolö aube biagi sêsa namiäiaie geloida, gobegi gaula neeboo.

¹¹ Sege uli nafade mia made dibe amoie beaha aligilo mugabeda, ilile beaha aligilo gini nea. Hibulu adoea ie ëida, Abadono, Giligi adoeada, Abolionola sälo.*

¹² Yöi edefade age amoda, hä, wagai. Gaso, nabuö! Amo baagia bu hobeala yöi edefade äudä, aso, moholömelë.

Selesaia fii gafe amea melo biguli amo fuusio

¹³ Amaimo, selesaia fii gafe amea melo biguli amo fuuse amo gaalu, Godeie odagia odala ilo auli goloea hamoi fäfü biyidia amoie bese biyidia dibe amila ado afädë säse nabelebe,

¹⁴ selesaia fii gafe melo biguli gaula neebe amoma sähalea, Selesaia fii biyidia ödä edefade Yubeledisi dibe ami nafodola negei difolalo amoli fisigämola säsio.

¹⁵ Amala säsebegi, udia dolö ohodoala mogelahilä, osoda amo sulubadela selesaia fii biyidia amolia nufudaha maademäia, ea ili fisigäsio. Aoa amogige, segeyo amogige, aube amogige, gäheo i amogige hamoi amo hamomolöie, ilia, hä, daiala beaha neeboo.

* **9:11:** Abadonole Abolionole nilile adoeada, Nelebo Sulubadela Neala Nafadelola sälo.

16 Sugua hosidaia fila aulo ami dolö amolile näbada, milienemu hädali äudä neeboo. Näbada amala neala afädëa säσιο.*

17 Na sosoäla awäla beahaleamelebe, sugua hosige, sugua hosidaia fila aulo amolige, gowe gadoi gabio. Ilia nudusalea, bidagia salugalo gadoi gäi amoïe galada, nulo söa heale uii gadoige, mu giwi yabui gadoige, igi abüai ëi saloba gadoige, gäi nefolalebeo. Sugua hosi amolile busada, ilua ügülo elaeonoïe busa gadoi gabio. Amase, nulo söage, höbage, igi gadoi ëi salobage, sugua hosi amoïe nafiadila doadidigila awäha neeboo.

18 Neala nafadelasilo geloi ohodoa amea, nulo söage, höbage, amase, igi gadoi ëi salobage, sugua hosi amolile nafiadila besela galala, udia dolö ohodoala mogelahilä, osoda amo sulubadela baagomäia nufudaha maadesio.

19 Sugua hosi amolile geloida, nafigige, hobegige dibeo. Ilile hobe amoda, nuba gadoi hamolahilä, oböla, nuba busa hamoi gabio. Hosi amolile hobe ameada, udia dolö afisila nufidelo gabio.

20 Udia dolö odoa neala nafadelasilo geloi amolia made nufi nefolalo amoliada, hilile naaboea hamoi amoli fisila, asigi besula made nelo. Ilia mugabe amolile ëige, wäfalï gode goloeage, silibaeage, igi aeane ëi bolonosiage, igifaliage, iiage, elö elöla hamoi amolile ëige, gauia adalo amo made fisila neeboo. Wäfalï gode amolile siia made melëloge, gëhea made nabeloge, emoea made naweloge hamola negei dibeo.

21 Aso, ilia udia dolö baagomäia nufideloge, golë

* 9:16: Näba säi amoda, 200,000,000.

hamologe, udia dolö susugu hamologe, nelebo fa neloge, amoli hamolo amoda, asigi besula made neeboo.

10

Selesaia fia beba iasebegi, Yonea mai

¹ Amase, na beahaleamelebe, selesaia fii geloi elö selesaia mosöala digaha neeboo. Mu baidilia e salugalahlä, soläiloea ië busagia amalela negei neeboo. Ië odagi yo digai amoda, eso neë gadoige, ië emo äudä amo helegela igaugi nulo söa aligi gadoige neeboo.

² Ea beba holöfalä afädë gaula neeboo. Beba amoda, ië naabodaia hogala negei dibeo. Ië emo dafädida, duhuludaia emesala, amase, fefeädida, nagadaia emesalala nea,

³ ea gelola uuai amoda, ilua ügülo gadoi elaeo-noea halalo amo gadola gelola uuasio. Ea uuaia gai amole, sege hahalä gifalädalälä dagabola, hili sälo amo gadola säsio.

⁴ Hahalä gifalädalälä dagaboi amole, ado ilia säi amo na dëdëdelä hamolebeda, Hebenila ado afädëa säia idogosalea, Hahalä gifalädalälä dagaboi amolia ado säi amoda, dië asigigi musügä negemalo, dëdëmabiola säsio.

⁵ Selesaia fii duhuludaia emesala nagadaia emesalala neebe na meli amea, ië naabo dafädi amo selesaia mosöa gauia adogola nea,

⁶ afädë namolöi namolö neebe ameadä, muge, naga föige, ödä duhuluge, amase, nelebo sulubadela amoligi dibe neebe sebe amolige, hamosa maadei amoie ei säla migalä diigila,

ado gelola sāla negesalea sāhalea, Segeyo beaha namolö elöda, maademelë.

⁷ Selesaia fii gifalädalü amoie melo biguli goba moholö amoie segeyogi, ea fuudelä hamose amo gala, Godea ie hamoi hamolasilo bea sālo nefolalo amolima dafidi sāla i amo gadola, ie galone musügä negei dilo amo gadola wāla, hamosa maademolömelëla säsio.

⁸ Afädëa Hebeni gadogola säse nabi amea nema bu elö sāhalea, Selesaia fii duhuludaiage nagadaiaage emesalala neebe amoie naabodaia beba hogala negei dibe amo, dia nimolö mosöla säsio.

⁹ Amala säsebegi, ne selesaia fii neebea ami awāla ema sāhalea, Dia beba holöfali go nema imola sai. Amala säsebegi, ea nema sāhalea, Dia neala muö. Nafia nase amoie hädäda, nebali ödä hädä amo gadoi gasoda, die hagömo sémolömelëla säsio.

¹⁰ Amala säsebegi, beba holöfali ie naaboea gaula neebe amo, na neala mai. Neala nasebegi, nie nafia hädäda, nebali ödä gadoi gabio. Oböla, naala dëgilebeda, nie hagömo oböla sësio.

¹¹ Amala hamosebegi, ilia nema sāhalea, Udia dolö gädili yafiegi nefolalebe amolilege, gafodo elö elöi yafie nefolalebe amolilege, ado elö elöla sālo yafie nefolalebe amolilege, amase, beaha aligilo gini yafie nefolalebe amolilege, dia bu bea sāla, sāla iaha namolö dialeala sāla iasio.

11

Dolö äudäea ado sāla ulufai

¹ Amalahilä, afädëa nelebo dofe melëlo i gili gadoi afädë nema iahalea sāhalea, Di nowela Godeie mosöge, odala ilo aulige, dofe nealahilä, udia

dolöea mosöa ami Godeie ei gauia adalo nefolalebe amolile näbage nidela nimalo.

² Be, mosö amoie yala baagido gedosia segeamadida, dofe nimabio. Mida, sege amoda, udia dolö fii odoagali i dialea. Amoli maalahilä, gaamu Godea hile nafolai dibe amo aube nabülasi biyidiaie odoai äudägi emesala nolealesa namolömelë.* *

³ Amaha neëgi, na nie säla ulufalo dolö äudä amolema gelolasiseda, elea bobasëi fagulo salugalahlä bea säha nea, segeyo dausini afädëie hädali äudäie nabülasi gafeiagi, bea säha namolömelëlä säsio.

⁴ Dolö äudä amole gadoida, i olibe äudä amolege, elamu i äudä amolege, sege föi dibe amoie Dafidilo Geloï neebe amoie odagia nowela aligilo nea.*

⁵ Amase, afädëa ele neala nafademolö helësëse amoda, elele nafiadila nulo söa doadigila maasebe amea, elebalä ado nease amoda, naha maademolömelë. Ele neala nafademolö helësëse amolida, amo gadola wäla baagomäia nufulö dialea.

⁶ Elea bea säla säha neëgi, sege made digamäia, mu gala digilo geloi gaula nea. Amase, ödä sulubadela heale uula besela gamamäia geloige, nagadaia udia dolö nefolalebe amolima neala nafadelasilo geloi elö elöla besela gamamäia

* **11:2:** Abosolo 21.30gi säi dibe amo bimalo. * **11:2:** Aube nabülasi biyidiaie odoai äudäla säi amoie segeyoda, dausini afädëie hädali äudäie nabülasi gafeia gadoi (1,260), amase, gäheo ida, ohodoaie aube gafeia gadoi. Danialo 7.25ge; 9.27ge; 12.7ge bimalo. Udia dolö fii odoa nefolalebe amoliada, Yalusaleme emesala nolealemolöla säi amoie, Ulugu 21.24 bimalo. * **11:4:** Segelaea 4.1-5ge, 4.10-14ge; Ulufai 1.12ge bimalo.

geloige, elea gaula nea. Elea amala hamomolö helësese amo gadola hamomolöie, geloi gaula nea.

⁷ Elea, hä, Godeie ado säla ulufaha maadeseda, sugua ilaba sege uli nafade mia made dibeä amila doadigila fedase amea, elebalä nudula salolela baagila moholömelë.

⁸ Amala hamoseda, elele domalo amoda, gaamu ilibia edefade amoie aulo idiafa negesimolömelë. Gaamu amoie ei oodo bealada, Sodomo Isibila sämolöi dialea, elele Dafidilo Geloi i fügäigi baala negeia amimelë.

⁹ Segeyo ohodoa nelolahilä, biyidugi nofela, udia dolö gädili elögi elögilaeage, fii elögi elögilaeage, ado sälo elögi elögilaeage, gafodo elö elöiage, elele domalo memelelahilä, made baumäiala säla dofog-amolömelë.

¹⁰ Nagadaia udia dolöea ele baagoi amogi obeägila, gosahalea molö nadigi, ilile damelëgali galu iädigisa namolömelë. Mida, bea sälo äudä amolea nagadaia udia dolö amoli së iaha nelo amogi.

¹¹ Gaso, segeyo ohodoa nelolahilä, biyidugi nofela, Godea namolö hame amo elele isogi bu negela obëgësebegi, ele nowela neebeo. Udia dolöea ele beahalea, edefademalä bedäsio.

¹² Amala hamosebegi, bea sälo äudä amolema selesaia mosöala ado gelola säia idogosalea, Ali yawe fedamola säse nabi. Amala säse amo gaalu, ado nii nefolalo amolia ele siila beaha nebegimu, ele mu baidili gegoala Hebeni fedasio.

¹³ Amala fedai amole, fogoli edefademalä maa-halea, gaamu amogi mosö sëgëlasida amilahilä, nabü amo mugulula digaha maadesalea, udia

dolö dausini gifalädalä nufudaha maadesio. Udia
dolö odoa nefolalo amolia edefademalä bedäla,
Gode Hebeni neebe amoie ei gauia adasio.*

¹⁴ Yöi edefade agedu amoda, hä, wagai. Gaso,
nabuö! Yöi edefade osoda moholö amoda, hä, ga
made gabumelë.

*Selesaia fii gifalädalü amea melo biguli amo fuu-
sio*

¹⁵ Selesaia fii gifalädalü amea melo biguli amo
fuusebegi, selesaia mosöa odoaea ado gelola
sähalea,

Sege föi sulubadelaie beaha aligilo gini
namolö geloi amoda, walio nilile Dafidilo
Geloile, ie Afädë Memelei amolele geloi
besela galai nea.

Hä, ea beaha aligilo gini namolöi
namolömelëla

säsio.*

¹⁶ Amala säse amo gaalu, dolö asigi gäwi dafidilo
nabülasi äudäie odoai biyidia amolile sigi aligilo
filodaia Godeie odagido filo amolia gumusula dia
didigafulahilä, Godeie ei gauia adogola

¹⁷ sähalea,

Dafidilo Geloi Gode, Sulubadelaie Geloifali
Geloi nebegö,

walio nebegoge, siiba nelo amoge,
dia die geloi edefade amo neala gaulahilä,
beaha namolö mi gäwisebegogi, nilia
dima nese gesa.

* **11:13:** Näba säi amoda, 7,000. * **11:15:** Afädë Memelei amoda,
Giligi adoeada Gelesola sälo.

¹⁸ Udia dolö di helësëlo made nefolalebe amolia mihaläi nelo gaso, dië mihaläloda, misi dialea.

Baagoi amoli mogemolö segeyo amoge, misi dialea.

Die hamoi hamolasilo bea sälo amolimage,
 dië udia dolö amolimage,
 ëi sälo dibalä bedälo amolimage,
 ëi sälo made, dibalä bedälo amolimage,
 bidi ïmolö segeyo amoge, misi dialea.

Amase, sege fõi nafadelo amoli nafademolö segeyo amoge misi dialeamelëla

säha dibeo.

¹⁹ Amala säsebegi, Hebeni gadogo Godeie mosö dogä negelahilä, ie asialo made ado säi bogosigi sali dibe amoda, mosö isogi ulufai dibeo. Amase, sege yabagelelage, goba hïdo elöige, hahalä edefade dagabolage, fogoli afädëge maala, sege gägä yafiege digalala, amoli sulubadela hamosa aligisio.

Mugabe Saidanige e sosogo nefolalo amolige neala nafadesa maadei

12

(Ulufai 12-20)

Yonea udiale gamele meli

¹ Amase amo gaalu, melëlo made gadoi nofe elöi edefade afädë mudaia adogo ulufadigisio. Amoda, udia afädë neeboo. Ea esoda fagulo gälo amo gadola gäi nea, ie emo hawa aube aligilahilä, ie busagia nudula salolelo habuga salugalo amo gadola, gasumili giwilasi salugai neeboo.

² Eda, hä, fagulo hagui sebeo. Malö ägümolö ga madesalea, sē edefade nahalea, gelola üasio.

³ Aso, melēlo made gadoi nofe elöi mudaia adogo elö ulufadigisio. Wae! Amoda game gadoi edefade afädē, bēi nulo sōa gadoi, busa gifalādalīa osogoloi, beseda nabūlasi neeboo. Busa osogoloi gifalādalīa amogida, gini habuga gifalādalīa salugai neeboo.

⁴ Gasumilī ohodoala mogelahilā, game gadoi amoie hobeaa osoda amo sulubadela mudaiala doala, nagadaia sadia idogosisio.

Amalahilā, udia amea malö neegela ägüsedaa, malö amo fodolofalī nufudala molöie, game amea udiaa malö ägüse amoie odagiamadila beaha neeboo.

⁵ Amala nebegi, udia amea dolö malö afädē neegela ägüsisio. İe malö amoda, afädēa fodolofalī fedela neala, Gode neebeeaa amige, İe beaha aligilo filo dibeaa amige, sogobala gaula fedasio. Malö ameada, hobeaa udia dolö gädili sulubadela aeane baialaea beaha aligilo namolömelē.

⁶ Udia amoda, udia dolö aligisia made ami fisāla awāsio. E ami namiāia, Godeaa sege afädē daiala negei dilo. E ami seēgida, odoaea e segeyo dausini afädēie hädali äudāie nabūlasi gafeiagi sigi nea, molö İaha namolöie daiala negei.*

⁷ Hä, selesaia mosōa edefademalā nudusio. Maigolola İe selesaia fii amolalia game amobalā nudusebegi, game amola e sosogo amolalia ilibalā nudula obēgēsio.

* 12:6: Nāba sāi amoda, 1,260.

⁸ Amai gaso, ilia nudusalea, game amoë geloi maadesebegi, ili selesaia mosöa namolö fuda, maademelëla säla hailsisio.

⁹ Game gadoi edefade amo nesila digisio. Eda nuba gadoi siiba dilo amomelë. Ìe ëida, mugabe busale Saidanilela sälo. Eda sege sulubadelagi nefolalebe amoli nafade hamomäia sigi gaula aulo. E hä, nagadaia nesila sadia idogosio. Amase, e sosogo amolige, ebalä nesila sadia idogosio.

¹⁰ Amala hamose amo gaalu na nabelebe, selesaia mosöala ado afädë gelola sähalea,

 Nilile nedoo nalifila ilia nafade hamoila sälo amoda,

 dafidi nilile Godeie odagiamadi nea, yoba
 gasigige ilia nafade hamoila säsäla
 maaha nelo amoda,
 nesila sadia idogosio.

Ameada, nilile Godea nili damula moholö amoge,

 ea Beaha Maadela Sigi Namolö amoge,
 ie geloi amoge,

 amase, ie Afädë Memelei neebe amoie
 beaha maadela namolö geloi amoge,

waliowegi hä, besela galai dialea.

¹¹ Sugua Sibi Malö amoie healeage, ado mala dofä ulufala säla ilo ameage,

 ilia ebalä nudula salolela baagila asi gabio.

Ilia hilile namolö amo made helësëla, së naala baagomolö diëgi, gamelä, aso maadela, baagomolöi nelo.

¹² Amai gabugi, Hebeni diage, Hebeni nefolalebe diliage obeägimalo.

Gasu, naga fōi dige, ödä duhulu dige,
asigii gabu.

Mida, mugabeie busa Saidanida, dili nee-
bea digai neebe gogi.

E namolö fu segeyo ede made dibe amo
helësëse amea,
edefademalä mihaläha neala

säsio.

¹³ Game gadoi amea e nagadaia nesila sadia
idogose amo beala, udiaea dolö malö neegela ägüi
awäse amo gadola, ea bögëla awäsio.

¹⁴ Amala bögëla awäsebegi gaso, udia dolö
aligisia made udia amoie segea ami hagila
mosäia, haea edefade sädia gadoie augia äudä
amo ema iasio. Segea ami nuba gadoi amea, e
made nufuäia, ilia e gäheo i ohodoaie aube gafeia
ami sigi namolömelë.

¹⁵ Nuba gadoi amoie nafiadila, ödä bëi edefade
awäse amea udia amo mola mosäia, isosio.

¹⁶ Isoi gasoda, nagaea udia amo ugila negesio.
Nagaea nafi dagala, game gadoie nafiadila ödä bëi
misi amo, ea naha maadesio.

¹⁷ Amala hamosebegi, game gadoi amea udia
amobalä edefademalä habobalahilä, ie malö odoa
amolibalä nudumolö awäsio. Malö amolida,
Godea hamomalola säla negei dibe amo gadola
bögëla hamologe, Yesuea ulufala dofäla säi amo
asigia dofäla gaula mogologe nefolalebe amoli,
sulubadelabalä nudumolö awäsio.

¹⁸ Game gadoi amoda, ödä duhulu agesua now-
ela neeboo.

Sugua ilaba äudäie ado

¹ Na aso, beahaleamelebe, sugua ilaba afädë ödä duhulugila fedala neeboo. Sugua ilaba amoie busa gifalädaläa osogoloi, ie bese nabülasi neeboo. Ie bese nabülasi amoligida, gini habuga gadoi gälähilä, ie busa osogoloi gifalädaläa amoli afädë afädëlagida, Gode gagadela sälo ei amoli dädëla negei dibeo.

² Sugua ilaba gadoi na meli amoda, ilua ügülo ei elebadi gadoi gaso, ie emoda sugua beaie emo gadoige, ie nafida, ilua ügülo elaeonoie nafi gadoige neeboo. Game gadoi amea ie geloi amoge, ie beaha aligilo filo amoge, amase, sigi namolö geloi edefade amoge, sugua ilaba amoma iasio.

³ Sugua ilaba amoie busa osogoloi amoligi, afädë nufudala baagoi gasoda, äyo amo bahola wahi neeboo. Nagadaia nefolalebe amoli sulubadelaea amo beala fudugilahilä, sugua ilaba amo bögëla afiasio.

⁴ Game gadoi amea sigi namolö geloi amo sugua ilaba amoma i amea, ilia game gadoi amoie ei gauia adalo neeboo. Amase, sugua ilaba gadoi amoie eige gauia adalo nea sähaleada, Sugua ilaba gowebalä afädëdida, nowë neadu. Nowëa ebalä nudumolöi neadula säha neeboo.

⁵ Sugua ilaba gadoi amea aube nabülasi biyidiaie odoai äudägi beaha aligiloie geloia sigi aligimäiage, e gugusämäia, Gode gagadela gelola uuala säha namiäiage, fu iasio.

⁶ Amala fu iasebegi, sugua ilaba amea nafi dagala Gode gagadesalea, ie eimage, ie sege dibe amomage, amase, ie sosogo Hebeni nefolalebe amolimage, gagadesa neeboo.

⁷ Ea Godeie udia dolöbalä nudulahilä, salolela baagila mosäia, ema geloi iasio. Ea fii sulubadelage, gädili sulubadelage, amase, ado elö elöla sälo sulubadelage, gafodo elö elöi sulubadelage sigi namiäia, ema geloi iasio.

⁸ Udia dolö nagadaia nefolalebe amoli sulubadelaea, sugua ilaba amoie ei gauia adaha namolömelë. Naga föi made hamola nea, udia dolö ilile ei namolöi namolö bebagi made dëdëla negei dibe amoliada, amamolömelë. Namolöi namolö beba amoda, Sugua Sibi Malö nufi amoie gabio.

⁹ Afädëa gëhea nabolöi galëda, ado gowe nabualo.

¹⁰ Afädë Godea galabaia moholöla daiai amoda, galabaia moholömelë.

Afädë nudulo helebea nufulöla daiai amoda, nudulo helebea nufudala baagomolömelë.

Amo gadola hamomolö ameadä, Godeie udia dolö amoliada, asigi afädë negela nea, aso maadela, gelola namolö dialea.

¹¹ Amase, na aso, beahaleamelebe, sugua ilaba elö naga isogila doadigila fedala aligisio. Ìe busagia bese äudä neebe amoda, sugua sibi malöie bese gadoi gasoda, ea ado säse amoda, oböla, game gadoia adolo amo gadola adolo gabio.

¹² Sugua ilaba agedu ameadä, sugua ilaba age amobalä nea, age amoie sigi namolö geloi sulubadela gaula neebeo. Amala gaula neada, ea sege sulubadelaeage, udia dolö nefolalebe amoli sulubadelaeage, sugua ilaba age amoie ei gauia adamalala säha neebeo. E nufudala baagoi gaso, oböla, äyo amo bahola wahi neebe amo.

¹³ Sugua ilaba agedu amea hamomolöi made gadoi edefade odo a hamosa neeboo. Afädëda, udia dolö nefolalebe amolile siigi, nulo söa mudaiala nagadaia digamäia hamosio.

¹⁴ Godea ema geloi iasebegi, e sugua ilaba age amobalä nea, hamomolöi made gadoi hamosa nelo amea, udia dolö nagadaia nefolalebe amoli dahila neasio. Ea udia dolö ilima sähalea, Sugua ilaba dafidi nudulo helebea nufi gasoda, made baagoi neebe amo dilia helësëla, ië ausulubo hamomalola säla iasio.

¹⁵ Amala säi amoda, sugua ilaba gadoi ausulubo hamoi amoma hame ifoloïe, ema geloi iasio. Ausulubo amea ado adomäiage, amase, ië ëi ilibiala made gauia adase amoli sulubadela nufudala baagomalola sämäiage, hame ifosio.

¹⁶ Sugua ilaba agedu amea ëi säloge, ëi sälo madege, nelegei yafie negelo dafidilo nefolalebe amolige, busadäoi amolige, galabaia hamoi gadoi hamolasilo amolige, odoäie hamoi made hamolasilo fisigäi nefolalebe amolige, sulubadela naabo dafädimadi galë, be, odagia galë magi negemäiala eegedigisio.

¹⁷ Amaimo, afädëma sugua ilaba age amoïe ëi magi maade galëda, be, ië ëi amoïe näba magi maade galëda, ea udia dolö odoama nelebo bidia nimolöge, amase, odoaea ema bidia nimolöge, maade gabio.

¹⁸ Dolö asigi falagasei neebe ameada, nelebo amo gowe gadoi gabula helësëmalo. Dolö dawa gaui neebe ameada, sugua ilaba gadoi neebe amoïe näba amo hedabola nidemalo. Näba amoda, dolö afädëie näba gabumelë. Ië näbada, hädali

gafeiaie nabulasi gafeiaie odoi gafeiamelē.*

14

Sugua Sibi Malö amoie udia dolö nefolalo amolia gë gähe udäi

¹ Wae! Na bu beahaleamelebe, Sugua Sibi Malö amo Saiono bia ami neeboo. Ebalä udia dolö dausiniu hädali afädëie nabulasi biyidiaie odoi biyidia amolile odagia, ie ëige, eedoie ëige, dëdëla negei dibeo.*

² Amo bealahilä nabelebe, selesaia mosöala goba afädë, ödä nawali guui goba gadoige, halälä dagaboi goba gadoige, dagabose nabi. Goba amoda, dolö ilia gida düi goba gadoi nabi.

³ Dausiniu hädali afädëie nabulasi biyidiaie odoi biyidia amolia, Godeie beaha aligilo filo dibe amoie odagiamadige, amase, namolö aligi biyidia nefolalebe amolile odagiamadige, dolö asigi gäwi dafidilo nefolalebe amolile odagiamadi nea, gë gähe udäha nefolalebeo. Gë amoda, udia dolö odoaea dawadigimolöi made. Dausiniu hädali afädëie nabulasi biyidiaie odoi biyidia,

* **13:18:** Näba säi amoda, 666. Dafidi ilia Hibulu adoge Giligi adoge amolegida, näba maade. Ilile näbada, *a-ba-da* afädë afädëla gowe gadoi dilo. *A* amoda, näba age (1). *Ba* amoda, näba agedu (2). Amase, *Da* amoda, näba osoda (3). Amala säsäla aulo. Amaimo, dolö afädëie ëi amo dëdëla beaha galebeda, *a-ba-da* näba gegedola nide-lahilä, amoie näba amo gowe gabula fädäla bimolöimelë. Dawadigi dolö iliada, näba 666 egoweleda, mi elö elöla helësei. Amase, dawadigi dolö yafieada, Yonea säi amoda, Sisa afädë ëi Neelo nelo amoie säi gabula helësei. Olomoie gini Sisa Neelo ameada, Geleso sosogo nefolalebe amoli neala sëlasisa aligilo. * **14:1:** Näba säi amoda, 144,000.

Godea nagadaiawi damula awäla sigi obëgëi nefolalebe amoliamu, gë amo dawadigimolöi gabio.*

⁴ Dolö amolida, udiabalä aligilo made ameadä, udiä amolibalä susugu hamolo made nefolalo. Ili nigime baai made neada, sege sulubadelagi Sugua Sibi Malö awäse amo gadola bëgëla aulo. Godeëge, Sugua Sibi Malö amoëge, ili abulümi gadoi namiäia, udiä dolö sulubadela amoligi, Godea ili damula awäla sigi obëgëi.*

⁵ Iliä wäfalï adoge sälo made. Ilima nafade afädëge maade gabio.

Selesaia fii ohodoaea ado säla ï

⁶ Amase, na aso, beahaleamelebe, selesaia fii afädë mu ilibia adogo hagila nawesa neebe melï. Ea namolöi namolö ado hedabi afädë nagadaia nefolalebe amolima säla ïmolöie, ado gaula hagila awäsio. Gafodo elö elöi sulubadelamage, fii sulubadelamage, amase, ado elö elöla sälo sulubadelamage, gädili sulubadelamage säla ïmolöie, ado gaula hagila awäsio.

⁷ Ea gelola uuala sähalea, Godeie gudila mogemolö segeyo amo, hä, besela galai dibe ameadä, dilia ebalä bedäla, ema ëi sälo neala sämalö. Muge, naga föige, duhuluge, ödä güge hamoi amoie ëi gauia adogomalola säsisio.

⁸ Na oböla, bu beahaleamelebe, selesaia fii dafidi asi amo gadola, selesaia fii elöge hobeala

* **14:4:** Giligi ado amea sähaleada, ilida udiabalä aligilo madela säi. Gasoda, dawadigi dolö yafiea helësësaleada, udiä dolö amolia mala nafade hamola made, Godea hamei dibe amolimu bëgëla hamolo amoie, ado besula säi gabula helësëi.

bëgëla awäha nea sähalea, Babilono gaamu ilibia edefade amo dagabola digaiie! E hä, dofä dagabola digala nafademolöi nafadeiee! Ea udia dolö fii sulubadelama ië wani ödä muäia mualasio. Ië wani ödä amoda, udia dolöea hïdo elöla gesami awäla susugu hamomäiaie mualalomelëla säσιο.*

⁹ Na aso, beahaleamelebe, selesaia fii dafidi äudä asi amole baagia, osodage awäsio. Ea gelola uuala sähalea, Afädëa sugua ilaba gadoi amoie ëige, hï e gadoi ausulubo hamoi amomage, ilibiala gauia adala, odagia galëge naabogi galëge magi ifolo amo

¹⁰ hï eege Godeie mihalälo hïdo elöi wani ödä amo molömelë. Wani ödä geloi amoda, ödäfalibalä gegoi made, Godeie mihalälo ödä iigi söga salala usi dibe amo molömelë. Eda selesaia fii hedabifali nefolalebe amolile siigige, Sugua Sibi Malö neebe amoie siigige, nulo igi gadoi ëi saloba wisa neebea ami, hïdo elöla së naha namolömelë.

¹¹ Ili hïdo elöla sëmäia, nulo wise amoie höbada, buugila fedaha namolöi namolömelë. Udia dolöea sugua ilaba amoie ëige, sugua amohï gadoi ausulubo hamoi amoge, ilibiala gauia adala, sugua amoie ëiie magi negei nefolalebe amolida, yoba

* **14:8:** Yonea beba gowe dëdëi amo gaaluda, Babilono gaamu edefade dilo amo nafadei amoda, walio made, gäheo i yafie baagibua dëdëi. Amoie, dawadigi dolö yafieada, dofä Babilono amoie säi madela helësëi. Iliada, ea helësësaleada, mala nafade Babilono ilia siiba hamolo amo gadola, gädili geloi elö neebe amea, nafade hamosebe ameadä, Godebalä ado neasebe amoie sähalea, ado besula säi gabula helësëi. Odoaeada, gädili Olomoie säi gabula helësëi. Age Fida 5.13 bimalo. Amase, odoaeada, udia dolö yafiea Gelesobaläge, ië udia dolöbaläge ado nelo amoie, oodo beala Babilonola säi gabula helësëi.

gasigige hele fimolö fuda, made bimolömelëla säσιο.

¹² Amo gadola hamomolö ameada, Godeie udia dolöea, ea hamomalola säla negei dibe amo gadola bögëla hamosa neada, Yesuma asigi afädë negela nea, aso maadela, gelola namolö dialea.

¹³ Na aso, nabaha nebegi, ado afädë selesaia mosöala säia idogosalea, Dia dëdësalea, Segeyo walio wila nofela, udia dolö Dafidilo Geloima asigi afädë negei nea baagose amolida, obeägisa namolömelëla säla dëdëmola säσιο. Amala säsebegi, Gesamia sähaleage, Ä, amo dofä. Ili awähalea, mala hedabi ilia hamosa nelo amoda hilibalä moholö ameada, ilia hamoi baagi sëi hamosa nelo amo fisila, hele fimolömelëla säσιο.

Nagadaia molö dibe amo neala gegedola nege-molö

¹⁴ Wae! Na aso, bu beahaleamelebe, mu baidili falei afädë meli. Dolö afädë dolöfä gadoi mu baidili amodaia sebeo. Ië busagia gini habuga gadoi goloea hamoi amo salugalahlä, ië naaboeada, widi damulo helebe sugalëi meifalë gaui gabio.*

¹⁵ Aso, amo beaha neebegimu, selesaia fii elö Godeie mosöala doadigila maalahilä, mu baidilidaia sebe amoma gelola uuala säia gahalea, Nagadaia molö difolalebe amoli bësä maadei gabugi, molö damula gegedola negemolö segeyo besela galai ameada, dia helebe sugalëi gaui goea, hä, damumalola säσιο.

* **14:14:** Danialo 7.13 bimalo.

¹⁶ Amala sälebegi, mu baidilidaia sulo amea, ië helebe sugalëi gaula sulo amo nagadaia fisiga idogolahilä, hä, nagadaia molö amo damusa maadesio.

¹⁷ Amase amo gaalu, selesaia fii elö Godeie mosö Hebeni neebee amila doadigila maasio. Eage helebe sugalëi meifali gaui gabio.

¹⁸ Amase, selesaia fii elö nulo gobei beaha aligilo amoge, odala ilo auli dibe amila maalahilä, selesaia fii helebe sugalëi meifali gaula neebe amoma ea gelola uuala sähalea, Ëfë gägä negelo gelebi negei dibe amolida, bëi gabugi, die helebe sugalëi meifali gaula nebegoea, nagadaiaie gelebi ëfë sagai dibe amoie gägä maa amoli damula nealahilä, gafedela negemalola säsio.

¹⁹ Amala säsebegi, selesaia fii amea ië helebe sugalëi gaula nelo amo nagadaia fisiga idogola, gelebi ëfë maa dibe amoli damulahilä, gafedela negela gelebi damui amoli emesala fësëlo edefade igi duwi amogi salasio. Amoda, Godeie mihalälo amoie säi dialea.

²⁰ Amala salasebegi, gaamu edefade amoie yala baagido, gelebi gägä emesala fësëlo igi duwi dibe amogi, gelebi gägä maa damula sali amoli emesala fësësio. Amai ameada, igi duwi dibe amila heale awäse amoda, magi sedade gilomida hädali ohodoa gadoige, amase, hulula fedai amoda, sugua hosie migalibalä gaalui amo

gadoige awäsio.*

15

Selesaia fii gifalädaläaea neala nafadelasilo geloi gifalädaläa gaula neeboo

¹ Na aso, beahaleamelebe, selesaia mosöa melëlo made gadoi nofe elöi beala fudugilo amo gadoi meli. Amoda gomalä. Selesaia fii gifalädaläa nefolalebe amolia udia dolö neala nafadelasilo geloi gifalädaläa hamola wagamolöie gaula nefolalebeo. Neala nafadelasilo geloi gifalädaläa amoli hamosa maadesebegi, Godeie mihalälo edefade amo wagamolö amea, neala nafadelasila hamola wagamolöie säi gabio.

² Aso, amala beaha nea beahamelebe, ödä duhulu edefade afädë galasi gadoi nulo söabalä gegoai dibeo. Amase, duhulu galasi gadoi agesua ami, udia dolöea sugua ilaba gadoi amobaläge, sugua hi e gadoi ausulubo hamoi amobaläge, amase, ie eiie näba amobaläge, nudula salolela baagila asi amoli nefolalebeo. Ami nowela nefolalea, gida gadoi Godea i amoli gaula nefolalebeo.*

* **14:20:** Dawadigi dolö yafieada, gaamu edefade amoda, Yalusaleme gabula helësei. Amase, ilia Giligi adoea *sidadia* dëdëida, *sidadia* dausini afädëie hädali gafeiala dëdëi. Näba säi amoda, 1,600. Egoweda, gilomida hädali ohodoa gadoi. Yonea säi amoda, dofä gilomida hädali ohodoaie dofe säiledu ma, nelebo odoai näba dausini afädëie hädali gafeiala säla dëdëla negeiledu.

Nilä dawa made. * **15:2:** Ado yafie hogoli gowegi dibe amo gadoida, Mosesea ado säi dibe amogi dialea. Isibi ili neala nafademäia, Mosesea nelebo elö elöla hamosa nelo. Amasebegi, Isilale ili Isibi dīgila, duhulu dēgēla awāla alōmodi bosea ami nea, Mosesela Isilale udia dolö amolalia Godema gē afädë udāha nefolalo. Sigi Obēgēi 15 bimalo.

³ Gida amoli gaula nefolaleada, Godeie hamoi hamolasilo Moseseie ge udalo amoge, Sugua Sibi Malo amoie ge udalo amoge udaha nefolalebeo. Ila ge udoi amoda gowe.

Dafidilo Gelo Gode, Sulubadelaie Geloifali Gelo neebe-eee,
dia hamosa aligilo amo beala, hido elola fudugilo-ooo.
Gadili amolile gini-iii,
die malada, mogoige, dofage nea-aaa.

⁴ Dafidilo Gelo-e, dimu hedabi hido eloi nebegoo.

Ameada, dibala nowea made bedalahila-aaa,
die ei ilibia amo made olesa namolodu-uuu.

Die mala mogoi hamolo amo ulufai ameada-aaa,
udia dolö fii odoa nefolalebe amoli sulubadela maala-aaa,
die odagiamadi nea, die ei gauia adogomolömelö-eeela
säla udasio.

⁵ Amo baagia na bu beahamelebe, selesaia mosoa ami Godeie mosö idi gai doganegei dibeo. Amoda, Gode ilibala neala heléselo balai mosö gabio.

⁶ Selesaia fii gifaladalä amolia neala nafadelasilo geloi gifaladalä gaula nefolalo amolida, mosoa amila doadigila maasio. Ilida, fagulo nigime baai made, eleloi hedabi amo galahila, sogobe goloea hamoi amo ilile bidagia boboga gai maasio.

⁷ Maasebegi, namolö aligi biyidia nefolalo amoligi, afädäa falo gifaladalä goloea hamoi difolalo amoligi, Gode namolöi namolö neebe

amoë mihalälo usi nobai dilo amo, selesaia fii gifalädaläia amolima neala sogosa maadesio.

⁸ Amala sogosa maadesebegi, Godeë yo digalomadilage, ie geloimadilage, höba fedase amea, ie mosö amo nobasio. Amala nobasebegi, neala nafadelasilo geloi gifalädaläia selesaia fii gifalädaläia amolia gaula nelo amea nufudala made wagaia, afädëa mosö amogi nogila digamolöi made gabio.

16

Godeë mihalälo falo gifalädaläiagi usi dilo amo söga sali

¹ Na nabaha nebegi, Godeë mosöa amila afädëa selesaia fii gifalädaläia amolima ado gelolafali uuala sähalea, Dilia Godeë mihalälo falo gifalädaläiagi usi dibe amoli, nagadaia söga salimolö mosalola säsio.

² Amalebe, selesaia fii age amea awälahilä, ie falogi usi gaula nelo amo nagadaia söga salasio. Amala söga salasebegi, udia dolö sugua ilaba gadoi amoë magi negela, ie ausulubo gadoi ilibiala gauia adaha nefolalo amolima, äyo ayägöloi sëlö edefade ilile domalogi aligisa maadesio.

³ Selesaia fii agedu amea ie falogi usi gaula nelo amo ödä duhuludaia söga salasio. Amala söga salasebegi, ödä duhulu amo dolö baagoi gu heale gadoi hamola besela galasebegi, ödä duhulugi sefolalo amoli sulubadela baagosa maadesio.

⁴ Hä, selesaia fii osoda amea ie falogi usi gaula nelo amo ödä afufui difolalebe amolidaiage, ödä gü besela galasebea amige söga salasio. Amala söga salasebegi, ödä amoli heale uui besela galasio.

⁵ Amala hamose amo gaalu, na aso, nabelebe, ödä amoli beaha aligilo selesaia fii amea sähalea, Eleloi-e, walio neebewege, dafidi nelo amoge, dia amala mogei ameada, dida asigi mogoi nea.

⁶ Mida, ilia die udia dolö nefolalo amolilege, die bea sälo nefolalo amolilege, nufi heale digasebegi, dia heale hili muäia neala i amoda, ilia nafade hamoi amo gadola bidi mogola imelëla säse nabi.

⁷ Odala ilo auli amea säla obëgësalea, Dafidilo Geloï Gode, Sulubadelaie Geloïfalï Geloï-e, dofä. Dia udia dolö mogesaleada, dofä dibe amo gadolage, mogoi dibe amo gadolage, mogola gudilo nebegola säse nabi.

⁸ Selesaia fii biyidu amea ie falogi usi gaula nelo amo esodaia söga salasio. Amala söga salasebegi, nulo söa gadoia udia dolö giamäiaie esoma geloï iasio.

⁹ Eso hëgi geloï hïdo elöi amea udia dolö amoli giasebegi, neala nafadelasilo geloï amoie beaha aligilo Gode neebe amoie ëima ilia dolälela ado nafadela säsio. Amala hamose amogida, ilia Godeie ëi gauia adogomolöïela helësëla, asigi made besusio.

¹⁰ Selesaia fii bi amea ie falogi usi gaula nelo amo sugua ilaba gadoi amoie beaha aligilo filo-daia ami söga salasio. Amala söga sali amea, ie beaha aligilo dibeami gasimidulä negesisebegi, udia dolöea së edefade nahalea, besea hilile eli damula naha dibeo.

¹¹ Ili së nase amogige, äyo aligise amogige, Gode Hebeni neebe amoma dolälela ado nafadela säha dialeada, ilia nafade hamosa nelo amo fisila asigi made besusio.

¹² Selesaia fii gafe amea ië falogi usi gaula nelo amo ödä edefade Yubeledisi amodaia söga salasio. Amala söga salasebegi, eso maasido gini nefolalo amoli mofiamäia, idi doga negesalea, ödä amo usisa maadesio.

¹³ Amase, na beahaleamelebe, mugabe nafade ohodoa sai gadoi sebe meli. Sai gadoi amolida, game gadoi amoie nafi idigilage, sugua ilaba gadoi amoie nafi idigilage, amase, wäfalä bea sälo neebe amoie nafi idigilage, doadigila maase meli.*

¹⁴ Ilida mugabe nafade, hamomolöi made gadoi nofe elöi hamolo. Gädili sulubadelagi afufulahilä, Gode, Sulubadelaie Geloifalä Geloï neebe amoie segeyo edefadegi nudumäiaie, ilile gini amoli gegedolasilo.

¹⁵ Wae! Neda fa nelo mulo amo gadoi mohölömelä. Afädë süwia made diala, ië fagulo nelebo hï e sebe gaalu ami negesiä sebe ameada, obeägisa neamelä. Mida, e udia dolöie siigi, dudugimu hewai made mohölö amea.*

¹⁶ Hä, gesami nafade amolia sege ëi Hibulu adoeada, Amagedono ami gini amoli maala

* **16:13:** Wäfalä bea sälo egoweda, sugua ilaba gadoi agedu amomelä. Eda sugua ilaba gadoi age amoie bea sälo gadoi neada, udia dolö ilima, sugua ilaba age amoie ausulubo amo ilibiala gauia adamalalomelä. Ulufai 13.11-16ge; 19.20ge bimalo. * **16:15:** Damo 15 egoweda, Yesu hï säi dialea.

gegedolasisio.*

¹⁷ Selesaia fii gifalädalü amea ië falogi usi gaula nelo amo mudaia söga salasio. Amala söga salasebegi, Godeie mosöa beaha aligilo filodaia amila, ado afädë gelola uuala sähalea, Hä amo! Wagai gommelëla säasio.

¹⁸ Amala säi amole, sege yabagelelage, goba hïdo elöige, hahalä edefade dagabolage, amase, fogoli edefade afädëge maasio. Fogoli misi amoda, siiba amo gadoi maase meli made. Amoda, dolö mi gäwila nagadaia nelo amila misi amoli gidogolahilä, dofä edefade gelola maasio.

¹⁹ Gaamu ilibia edefade amoda, ohodoala gagabogila dusulahilä, udia dolö odoäie gaamu difolalo amolige, mugulula digaha maadesio. Amase, Godea Babilono gaamu edefadeie mala amo helësëlahilä, wani ödä gaabogi usi dilo amo muäia iasio. Wani ödä amoda, ië mihalälo edefade usi dilo amo mualasio.

²⁰ Ödä södölo difolalo amoli sulubadela fisäla awäha maadesalea, segebi nefolalo amoligi afädë neëge, bimolöi mademelë.

²¹ Sege gägä boboga mudaiala digala, udia dolödaia daala negesio. Amo digase amo hïdo hïdolaie yöi giloda, nabülasi bia gadoi gabio. Neala nafadelasilo geloi dofä nafade ameada, sege gägä

* **16:16:** Ëi Amagedono egoweda, gowe gadoi. Megidoie segebi. Siiba ado nii dolö nefolalo amolia Isilale ilibalä nudulahilä, Gini Yosaea nufi amoda, Megido gaamu amo ga madela ami nufi. Agedu Gini 23.29-30ge; Agedu Sedalu 35.20-24ge bimalo. Amaimo, dawadigi dolö odoaeada, mogola Megidoie säi gabula made helësëi. Amoliada, ado besula ami dolö ili afufulahilä, sulubadela nufudaha maadelo sege amo säi gabula helësëi.

boboga digai amogida, udia dolö ilia, oböla,
Godema dolälela ado nafadela säha nefolalebeo.

17

*Idigi nawela susugu hamolo udia amea bidi
nafade nii*

¹ Selesaia fii gifalädaläaea falo gifalädalä gaula
nefolalo amoligi, afädë maalähilä nema sähalea,
Idigi nawela susugu hamolo udia ëi sälo, ödä
yafie nedase amolile agesugi ami sebe amoda, hï
nafade hamoi amoëe bidi nimolö amo oledelä, di
misië.

² Nagadaia gini nefolalebe amolia udia amobalä
susugu hamosa aligisio. Amase, wani ödä naala
gagaolo amo gadola, udia dolö nagadaia ne-
folalebe amoliage, ebalä susugu hamolo amea,
gagaosa difolalebeola säsio.*

³ Gesami e nema salugasisebegi, selesaia fii
amea sege udia dolö aligisia made ami, ne sigi
awäsio. Ami awäla besela galahamelebe, sugua
ilaba bëi edefade afädëe baagidaia, udia afädë
sebe meli. Sugua amoëe domalo sulubadelagi,
Gode gagadela sälo ëi amoli dëdësa maadei nea,
ie busa gifalädalä osogoloi amogi, beseda nabülasi
gabio.

⁴ Udia amea fagulo hogale uiiige bëige salu-
galähilä, goloea hamoi si dëdëgï yafie ameage,
igi elöi muni edefadea nelo ameage, bageëe isogi

* **17:2:** Damo egowea susugu hamolola säi egoweda, udia dolö ilia
mala hamosebe amea Gode dīgīla, wāfālī gode bēgēla, mala nafade
elöi elö elöla hamosebe amoëe säi. Godeie sidaiada, gowe gadoi
galea. Dolöea hīle udia nii fisila, udia odoabalä susugu hamolo amo
gadoi.

momadoi hedabi amo gadoi helebe näia ameage, e momadola sebeo. Mala nafadefalī nafade elö elöla hamosa nelo amoge, e susugu hamosalea, nigime baai elö elöla hamosa nelo amoge, ödä i goloea hamoi amogi nobai amo gaula sebeo.

⁵ Udia amoie odagia ei afädë galone musügä negela gomalä dädëla negei dibeo.

BABILONO ILIBIA EDEFADE,
IDIGI NAWELA SUSUGU HAMOLO UDIA AMOLILEGE,
MALA NAFADefalī NAFade NAGADAIA HAMOLO
AMOLILEGE EMEMELĒLA

säla dädëla negei dibeo.

⁶ Udia amoda, Godeie udia dolö, Yesuie ei säla ulufaha nefolalo nufi amolile heale amo, hi naala gagaosa sebeo. Na amo beahalea, edefademalä fudugila säosäosa nelomelë.

⁷ Amala hamosebegi, selesaia fii amea nema sähalea, Di edogi fudugila säosäosebe. Udia amoiege, sugua ilaba gadoi, busa gifalädalīa osogoloige bese nabūlasige, e amodaia fila aulo amoiege, galone musügä negei dibe amoda, na dima awala säla imolömelë.

⁸ Sugua ilaba dia meli amoda, dafidi nelo, walioda maademelë, amase, sege uli nafade mia made dibe amila e fedasegi, nufudadigimolöie sigi moholömelë. Naga foi hamola made nea, nagadaia udia dolö ilile ei namolöi namolö bebagi made dädëla negei nefolalebe amoliada, sugua ilaba amo beala, fudugila bimolömelë. Mida, sugua ilaba amoda, dafidi nelo, walio maade amoda, oböla, bu obögëla moholömelë.

⁹ Dolö asigi falagasei neebe ameada, nelebo amo gowe gadoi gabula helësëmalo. Sugua busa

gifalädalīa amolida, segebi gifalädalīa amo gadoi gabio. Udia amoda, amolidaia sebeo.*

¹⁰ Busa gifalädalīa amolida, gini gifalädalīa gadoige gabio. Gini gifalädalīa amoligi, biada, baagoi. Gafe afädëa walio sigi nea, gifalädalü afädëda, aso, made misi. Hobeä, e maaseda, segeyo ede madegi sigi namolö dialeamelë.

¹¹ Sugua ilaba gadoi dafidi nelolahilä, walio wegi maade amo, hī eda, gini gödö nea. Gini gifalädalīa amoli gadoi neëgi, e nufudadigimolöie sigi moholömelë.

¹² Dia bese nabūlasi neebe meli amolida, gini nabūlasia sigi namolö geloi amo, aso, made neala neebe amolimelë. Iliada, sugua ilaba gadoi amobalä segeyo ede made holöbögi sigi namiäia geloi nimolömelë.

¹³ Gini nabūlasi amolia ado afädë negela, ilile geloige, beaha aligilo geloige, sugua ilaba gadoi amoma imolömelë.

¹⁴ Iliä Sugua Sibi Malö amobalä nudumolö gaso, eda dafidilo nefolalebe amolile Dafidilo Geloige, gini nefolalebe amolile Ginige neebe amea, ilibalä nudula salolela baagila moholömelë. Amase, udia dolö hī memelela wela ifosisi, e bëgëla aulo asigi falagasei nefolalo amoli, ebalä gedola namolömelëla säla iasio.

¹⁵ Selesaia fii amea nema sähamu nea sähalea, Ödä yafie nedase amolile agesugi, dia idigi nawela susugu hamolo udia sebe meli ödä amolida, gädili elö elöi amolige, udia dolö sämolö asusugai gege-doi amolige, gafodo elö elöi amolige, ado elö elöla

* **17:9:** Olomo gaamu edefadeda, segebi gifalädalīadaia uli dialeamelë.

sälo amolige nefolalea.

¹⁶ Amaimo, dia bese nabülasi neebe meli amoliage, sugua ilaba gadoi ameage, idigi nawela susugu hamolo udia amoma, edefademalä bimolö habobamolömelë. Ìe nelebo difolalo amo neala gaula awäsegi, hì eda gumusui dudugimu samialamolömelë. Amase, ilia ìe hü nalahilä, giwida nulogi gobemolömelë.

¹⁷ Godea dafidi säla negesalea, amala hamomolömelëla säla negei amo gadola hamomäia, ilile iso asigigi helësëlasisege, ilia ado afädë negelahilä, sigi namolö geloi nii amo sugua ilaba gadoi amoma ìmolömelë. Godea ado säla negei dibe amo gadola gausiaha maademäia, ilia amala hahamola awäha namolö gabio.

¹⁸ Udia dia meli amoda, gaamu ilibia edefade amo gadoi gabio. Gaamu ameada, nagadaia gini nefolalebe amoli sigi aligisebemelëla säla ìasio.

18

Babilono gaamu dagabola digai

¹ Amo baagia, na beahaleamelebe, selesaia fii elö selesaia mosöala digaha neeboo. Eada sigi namolö geloi edefade gaula nea, ìe yo digalo amea nagadaia yo digaha maadesio.

² Ea gelola uuahalea, Dagabola digaiee. Babilono gaamu ilibia edefade amo, hä, dofä, dagabola digaimelë. Walio gaamu amoda, mugabe nefolalebe amolile mosö hamola besela galai dialea. Mugabe nafade elö elöi amolilege, haea nigime baaige, nafadefali nafadege elö elöi amolilege mosö hamola besela galai gabuwe.

³ Mida, udia dolö gafodo elö elöi sulubadelaea ebalä susugu hamosa nea, ie wani ödä geloi amo naha nelo amea. Ie wani ödä geloi amoda, udia dolöea hido elöla gesami awäla susugu hamolo amoïemelë. Nagadaiaie gini iliage, ebalä susugu hamosa aligisio. Amase, ie gesami aulo edefade dilo amea, nagadaia bidi nelo dolö amolia hili ili nelegei yafie negelo dafidilo dolö hamosiola uuala säσιο.

⁴ Amo nabaha nebegi, ado elö selesaia mosöala sähalea, Nie udia dolö nefolalebela dili-e, sege go dīgila doadigila fedafiamalo. Ie nafade hamoi dibe amo gadola, diliage hamosegi, e neala nafadelasilo geloi dibe amoïe sē nase amogi, dilige gaalu nūloea, segea doadigila fedafiaha maademalo.

⁵ Mida, ea mala nafade hamoi amoli nelegela fedaha nea, selesaia mosö diigimolöi dibe ameada, mala dabiala ea hamolo amolida, Godea elaboi made, helēsēsa neamelë.

⁶ Hi odoama hamoi amo helēsēlahilä, amo dabela hamola obēgēmalo. Ea hamoi amoïe sulubadela, bu äüdäla dabela obēgēmalo. Ea wani ödä geloi odoaea muäia daiala negei amoïeda, eege muäia wani ödä geloi hido elöi amo, ie ödä iigi bu äüdäla daiala negemalo.

⁷ Ea hile ei ilibialahilä, nelegei sämolö asusugai hīma gegecola negei amo gadola, e sēmölöge, yömölöge, amo gadola wäla neala imalo. Ea hido sähalea, Neda beaha aligilo gini udia salea. Ne didalo salea made, yöla gualömolöda, dofä made bimölömelëla säha salea.

⁸ Ameada, segeyo afädēgimu neala nafadelasilo geloi amolia e nūfulömelë. E nūfulö geloi amolida,

baagoge, yöla gualömolöge, sädë iige dialea. E mogemolöda, Dafidilo Geloi Gode, e geloi edefade neebe amea, nuloea e gobesa maademolömelëla säasio.

⁹ Ado amea, aso, sähamu nea sähalea, Nagadaia gini amolia ebalä susugu hamomolöge, nelegei sämolö asusugai ebalä gegedola negeomolöge, hamosa nefolalo amolia, e gobese amoie höba bugu fedase amo bealahilä, e helësëla Gäia güsäla diisa namolömelë.

¹⁰ Ilia e së edefade nase amogi, fudugila bedäla, wagadi madela nea sähalea, Amei! Gaamu ilibia edefade-e, Babilono-o, gaamu geloi-e, asigii gabu. Aoa afädëgimu, dia mala nafade hamoi amoie bidi nimolö amoda, hä, misi gabugola sämolömelë.

¹¹ Ilile bidi nelo amoie nelegei neasimolö dolö afädë maadefali maade amea, nagadaia bidi nelo dolö amolia Babilono helësëla, asigia yöia idogola Gäia güsäla diimolömelë.

¹² Ilile nelegei negei amolida;
gologe,
silibage,
igi elöi muni edefadea neloge,
bageie isogi helebe näia momadoi hedabi amo
gadoige, amase,
fagulo faleige,
fagulo hogale uiige bëige,
fagulo eleloi ëlemeige, amase,
i elö elöla gafisigäige,
nelebo elö elöla sugua elöi edefade elefädiie be-
sea hamoi amoge,
i hedabi bidi edefadea neloea hamoi amoge,
igi aeane ëi bolonosia hamoi amoge,

aeanea hamoi amoge,
igi elöi bagala gadoia hamoi amoge dilo.

¹³ Amase,
molö hädälasiloge,
gafisigä hedabi baëlo amolige,
weli gafisigäige,
i heale gobesegi höba gafisigä hedabi baëla alig-
iloge,
wani ödäge,
welige,
balawa hedabifalige,
widige, amase,
sugua gaoage,
sugua sibige,
sugua hosige,
galo gadoi sugua hosima begela dusugala
auloge,
galabaia hamoi gadoi hamolasiloge,
udia dolöge.

Nelegei amoli sulubadela bidia made nimolö
gabusalea, nagadaia bidi nelo dolö amolia amogi
didigaomolömelë.

¹⁴ Ilia sähalea, Gägä bëi dia gesami awäla helësësa
aligilo amolida, di mia guila afiaha maadela,
nelebo sulubadela hedabifalë hedabi bidi ede-
fadea nelo difolalo amolige, dië momado hedabi
eleloi difolalo amoli sulubadelage, di mia hogosa
helesa maadei ameada, dofä dolö afädëa bu elö
made bimolömelëla sämolömelë.

¹⁵ Gaamugi ami nelebo amoligi bidi neala, muni
yafie neaha aligilo dolö amoliada, gaamu amea
hido elöla së nase amo beala bedälahlä, wagadi
madela nea, asigia yöia idogola gäia güsäla diisalea

¹⁶ sähalea, Amei! Gaamu ilibia edefade-e, asigii gabu. Dia fagulo falei hedabige, fagulo hogale uiige bëige salugala, goloeage, igi elöi muni edefadea nelo ameage, bageie isogi helebe näia momadoi hedabi amo gadoi ameage, die domalogi momadola nelo.

¹⁷ Muni edefadege, nelegei yafiege, aoa afädëgimu, sulubadela nafademolöi nafadesa maadeila sämolömelë.

Ödä sibi gaulo nefolalo amoli sulubadelage, udia dolö sibidaia fila aulo amoli sulubadelage, amase, sibigi hamoi hamolo amolige, sulubadelaëa ödä duhulu agesuage ödädaïage hamoi hamola bidi neaha nefolalo amolige, gaamua amila holöbö mia made, sedagila nefolamolömelë.

¹⁸ E gobese amoë höba bugu fedase amo bealahilä, ilia gelola uuala sähalea, Gaamu ilibia edefade egowe gadoida, abidi dialeadula sämolömelë.

¹⁹ Amala sälahilä, gulu dao gasala, ilile busagia fëfëla sadia adogolahilä, asigia yöia idogola Gäia güsäla diisalea, gelola uuala sähalea, Amei! Gaamu ilibia edefade-e, asigii gabu. Ami nelegei yafie negelo ameada, ödä sibië eedo amoli sulubadelaëa duhuludaia nawesa nea, muni yafie nelo. Gaamu amo aoa afädëgimu, neala nafademolöi nafadesa maadeïmelëla sämolömelë.

²⁰ Gaamu amoma hamoi amogi, Hebeni diage, Godeie udia dolö diliage, abosolo diliage, amase, bea sälo diliage, dili sulubadelaëa obeägïmalo. Mida, dilima hamolo amoë, Godea mogelahilä, së mogola ïmolö dilo amo gadola ïmelëla ado selesaia

mosöala säla wagasio.

²¹ Amala säla wagasebegi, selesaia fii geloi afädëa, igi edefademalä afädë widi dusumäia igi bebugula aulo amo wali, gauia adogola duhulugi sadia idogolahilä sähalea, We sadia idogose we gadola, gaamu ilibia edefade Babilonoge we gadola wäla, gelola sadia idogomolömelë. Dofä dolö afädëa bu elö made bimolömelë.

²² Babilono, dima gida dülo amo gadolage, gë udälo amo gadolage, fëla gälo amo gadolage, melo biguli fuulo amo gadolage, amolile goba dië yala isogi bu elö dofä made nabolömelë. Dolöea dawa neala hamoi elö elöla hamolo nefolalo amoli, dië yala isogi bu elö dofä made bimolömelë. Amase, balawa hamomolöie widi gägä dusulo igi amea bebugusalea goba fedasege, dië yala isogi bu elö dofä made nabolömelë.

²³ Gamali yo digalo amoda, dië yala isogi yo bu elö dofä made digamolömelë. Dolöea udia nimolö amole, udia dolö fila moholö amolele ado digase amoge, dië yala isogi bu elö dofä made nabolömelë. Mida, dia golë elö elöla hamola, udia dolö sege sulubadelagi nefolalo amoli dahila nelo ameada, dië bidi nelo dolö nefolalo amolia sege sulubadelaie ëi sälo dafidilo nelo.

²⁴ Bea sälo nufi amolile healege, Godeie udia dolö nufi amolile healege, amase, udia dolö sege sulubadelagi nufi amolile heale amola, gaamugi ami nagadaia difolalebe melimelëla säsio.

19

Babilono neala nafadei amogi ilia obeägi

¹ Amo bealahilä, hobeala nabelebe, selesaia mosöala, ado goba edefade udia dolö yafiea sälo amo gadola sähalea, Godeie ei gauia adadi. Nili damula moholöda, nilile Godemadila mulo gabio. Ei hido elöile, geloileda, nilile Godea gauleamelë.*

² Mida, ea udia dolöbalä memelela gudisaleada, dofäge, mogoige dibe amo gadola mogelo nea. Idigi nawela susugu hamolo udia ei sälo sebe amea susugu hamolo ameadä, nagadaia udia dolö neala nafadesa nelo amoie, ebalä gudilahilä, asiala hamoila säsio. Udia amea Godeie hamoi hamolasilo nefolalo amolile heale digai amoie, ema se mogola imolö dibe amo gadola iasiola säsio.

³ Amala sälahilä, ilia bu agedu sähalea, Godeie ei gauia adadi. Gaamu gobei amoie höba buguda, fedhamu namolöi namolömelëla säsio.

⁴ Amala säsebegi, dolö asigi gäwi dafidilo nabülasi äudäie odoi biyidia amoliage, namolö aligi biyidia amoliage, gumusula dia didigafulahilä, Gode beaha aligilo filodaia sebe amo ilibiala sähalea, Dofä amala hamomäiamelë. Godeie ei gauia adadila säsio.

⁵ Amala säsebegi, Godeie beaha aligilo filo dibeä amila ado afädëä sähalea, Ie hamoi hamolasilo nefolalebe dili sulubadela, Godebalä bedäla e hawala nea, ei sälo nefolalebela diliage, ei sälo made nefolalebela diliage, nilile Godeie ei gauia adamalola säsio.

* **19:1:** Beba goweda, Yonea Giligi ado adola dëdëi. Gaso, damo agegige, osodagige, biyidugige, gafegige, ea ado afädë Hibulu adoea dëdëi. Hibulu ado amoda, *Haleluia*. Nilile adoea sälada, Godeie ei gauia adadila sälo.

Sugua Sibi Malöea udia neahalea, molö edefade giai

⁶ Na aso, nabaha nebegi, udia dolö yafie gege-doi dialea ado gelola säi goba gadoige, oböla, ödä nawali guui goba gadoige, hahalä dagabolo amo gadolage, säse nabi. Ado amea gelola sähalea, Nilile Dafidilo Geloï Gode, Sulubadelaïe Geloïfalï Geloï neebe amea beaha aligilo neebe ameada, ïe ïi gauia adadi.

⁷ Nilïa edefademalä obeägïla, ema ïi sälo neala sädi. Mida, Sugua Sibi Malöea udia nimolö segeyo, hä, besela galasegi, ïe udia amea dadaiala sebe amogi.*

⁸ Dolö fimolö udia amoma fagulo falei nigime baai made, eleloi si dödögï salugamäia ïmelëla säsio. (Fagulo faleima oodo beala säi amoda, Godeïe udia dolö nefolalebe amolia mala mogoi hamolo amolimelë.)

⁹ Nema, aso, selesaia fii amea sähalea, Dia ado gowe dödëmo. Sugua Sibi Malöea udia neahalea, molö molöïe udia dolö hobe säi amoliada, obeägïsa neala säla dödëmalasio. Hä, ea nema sähamu nea gomalä säsio. Ado goda, Godeïe ado dofämelëla säla ïasio.

¹⁰ Amala säsebegi, na ïe emo mia gumusula dia digala, e ilibiadelä hamosebegi, ea nema sähalea, A! Amala hamomabio. Neda, dibaläge, didoo di-alifilalibaläge, Yesuea ulufala dofäla säi amo gaula

* **19:7:** Sugua Sibi Malöea udia nimolöla säi amoda, Geleso emelë. Udia nimolö säi sebe amoda, Geleso sosogo nefolalebe amoli. Sugua Sibi Malöea udia nimolöla säi amoda, Geleso e obögëla maala, ïe udia dolö sigi gaula moholö amoïe säi. Ea ïe udia dolö nefolalebe amoli sigi gaula, e neebe sege hedabia ami, ebalä namolöi namolömelë.

mogolo nefolalebe dilibalä, hamoi gaalu afädëdi hamolasilo neawe. Gode emu ilibiamalo. Yesuea ulufala dofäla säi ameada, bea sälo nefolalebe amolima helësëlasilola säσιο.*

Yonea sugua hosi faleidaia dolö afädë sebe meli

¹¹ Wae! Na beahaleamelebe, Hebeni dogä negei dibe amoge, sugua hosi falei afädëge neebe meli. Sugua hosi amodaia fila aulo sebe amoïe ëida, Asigi Falagaseige, Dofägela sälo amo gabio. Eada, mala mogoi amea mogela digiloge, nudula digiloge gabio.

¹² Ìe siida, nulo söa gadoi nea, ìe busagia gini habuga yafie salugai neeboo. Hì ema èi afädë dëdëi dibeo. Èi amoda, afädëa dawadigi made. Ea hìdomu dawadigi neamelë.

¹³ Ea fagulo sedade gäi amoda, healegi gesa maadei gabio. Amase, ìe èi amoda, Godeïe Ado dibeo.

¹⁴ Hebeniïe ami nefolalebe amolia fagulo falei hedabifali, nigime made baai salugalähilä, hilile sugua hosi falei amolidaia fìfigila, e awäse amo gadola bëgëla afiasio.

¹⁵ Udia dolö gafodo elöi nefolalebe amoli sulubadela nufudaha maademolöïe, nudulo helebe meifali ìe nafiadila besela galasio. Amala besela galähilä, aeane baialaea ea udia dolö amoli

* **19:10:** Ado egoweïeda, Giligi adoea fädäla made säi. Dolö odoaea ado goïeda, gomälä besulo. Neda, dibäläge, didoo diali-filalibaläge, Yesuma asigi afädë negela nea, ìe èi säla olelelo nefolalebela dilibalä, hamoi afädë hamolasilo neawe. Godemamu ilibiamalo. Eleloi Gesamia bea sälo nowela ifosila, Godeïe ado mala säla olelemäia, ea Yesuïe èi udia dolöma hedabola säla ulufalomelëla besulomelë.

beaha namolömelë. Eada gelebi gägä emesala fësëlo igi duwi dibe amogi, gelebi gägä damula sali amoli emesala fësëlo. Emesala fësëlo igi duwi dibe amoda, Gode, Sulubadelaïe Geloifali Geloï neebe amoïe mihalälo edefade amo dibeo.

¹⁶ Ìe fagulo sedade gäi amogige, ìe meselegige, èi gomalä säla dëdëla negei dibeo.

GINI NEFOLALEBE AMOLILE GINIGE,
DAFIDILO NEFOLALEBE AMOLILE DAFIDILO
GELOIGELA

säla dëdëla negei dibeo.

¹⁷ Na amo bealahilä, aso, beahaleamelebe, selesaia fii afädë esodaia neebe meli. E ami nea, mu ilibia haea hagila nawesa neebe amoli sulubadelama, gelola uuala sähalea, Godeïe molö molö edefade dibe amo molöïe, gegedola namolö mofiamo.

¹⁸ Dili mofialahilä, gini ilile domaloge, ami beaha aligilo ilile domaloge, dolö geloï ilile domaloge, amase, sugua hosi ilile domaloge, hosidaia fila aulo amolile domaloge, udia dolö sulubadela, galabaia hamoi gadoi hamolasilo amolilege, odoaïe hamoi made hamolasilo fisigäi amolilege, amase, èi sälo amolilege, èi sälo made amolilege, amoli sulubadelaïe domalo molö misiëla uuala säsio.

¹⁹ Amase, na aso, beahaleamelebe, sugua ilaba gadoi amoge, nagadaia gini amolige, ilile ami dolö amolige neala gegedolahilä, ilia dolö sugua hosidaia fila aulo amobaläge, ìe ami amolibaläge, nudumolö hamosio.

²⁰ Amala hamodelä hamosebegi, sugua ilaba amoge, ìe èigi wäfalï bea säloea hamomolöi made gadoi nofe elöi hamolo amoge gausio. Wäfalï bea sälo amea, hamomolöi made gadoi nofe elöi

hamolo amea, udia dolö sugua ilaba gadoi amoïe magi negela, ïe ausulubo gadoi ilibiala gauia adaha nefolalo amoli dahila neasio. Sugua ilaba gaui amole, wäfalï bea sälo gaui amole ofofola, nulo sôa fedala igi gadoi ëi salobaea wisa neebe oeabo gadoi dibeami, helegela sogobala sadia idogoso.

²¹ Dolö sugua hosidaia fila aulo amoïe nafi idigila nudulo helebe besela galase amea, ilile ami dolö amoli nufudala baagosa maadesio. Amala hamosebegi, haea sulubadela mafulahilä, baagoi amolile domalo amoli naha neamu bolesa maadesio.

20

Gäheo i dausini afädëgi mugabe Saidani galabaia negeila säi

¹ Na aso, beaha nebegi, selesaia fii afädë selesaia mosöala digasio. ïe naaboeada sege uli nafade mia made dibe amoïe idi gai dogelo giige, igi ëfë edefadege, gaula digasio.

² Game gadoi, nuba siiba dilo mugabe busa ëi Saidani amo, ea e gaula igi ëfë amea Gäheo i dausini afädë namiäia, nafodola negesisio.

³ Gäheo i dausini afädë amo, aso, made baagia, mugabe amea udia dolö sege elö elölagi nefolalebe amoli, bu elö made dahila nimäia, selesaia fii amea mugabe amo sege uli nafade mia made dibeami sogobala sadia idogolahilä, idi gasise amo dogeloea, nofe negela gasisio. Gäheo i dausini afädë baagilahilä, mugabe amo segeyo ede made nawesa namiäia, hä, fisigäla ifosimolö dialeamelë.

⁴ Na aso, beaha nea beahamelebe, beaha aligilo filo difolalebeo. Amolidaia fifigila asi sefolalebe amolia, gudi mogelo namiäia, Godea ilima geloi iasio. Na aso, beahaleamelebe, udia dolö yafie Yesuie ei ulufala säla olelelo nefolaloge, Godeie ado mala neala gaui nefolaloge, mugi damusebegi baagoi amolile gesami amoli nefolalebeo. Iliada, sugua ilaba amoge, ie ausulubo amoge, ilibiala made gauia adala, ie magi odagiage naabogige, made negei amoli gabio. Amoli baagoi amo nowela maalahilä, gini hamola, Gelesobalä gäheo i dausini afädëgi beaha aligisio.

⁵⁻⁶ Amo hamoi amoda, baagoi amoli mi gäwila bauia amila nowela ifosisio. Udia dolö mi gäwila nowela ifosi amolida, Godeie odala i neebe amoge, obeägisa neebe amoge, agedu baagomolö amea ili neala nafademolöie geloida, maade gabio. Ilida, Godeiege, Gelesoiege, odala i neala ilo nea, ebalä gäheo i dausini afädëgi beaha aligilo namolömelë. Gäheo i dausini afädë baagi amole, udia dolö odoa baagoi amoli sulubadela nowela ifosisio.

Saidani nufuda salala baagila asi

⁷ Gäheo i dausini afädë amo hä, baagiseda, mugabe Saidani e galabaia negei dilo amo fisigäla ifosimolömelë.

⁸ E doadigila awälahilä, sege föi sulubadelagi udia dolö elö elöla fäfü biyidiagi nefolalebe amoli dahila neaha namolömelë. Sosogo amoleda, Gogole Magogolela sälo. Ili sulubadelaea nudusa namiäia Saidania neala gegedolasimolömelë. Ilile näbada, nidemolö asusugai, ödä duhulu agesugi bose dibe amo gadoi namolömelë.

⁹ Amoli sege dibe sulubadelagi afufusa maade-lahilä, Godeie gaamu hi boba hamoi dilo amoge, ie udia dolö sege amogi sefolalebe amoge, nogöla amalesa maadesio. Ami amolia amala nogöla neëgi, selesaia mosöala nulo wisa neebe amo sadia idogoi amea, ili naha maadela su digasio.

¹⁰ Amalahilä, udia dolö sege elö elölagi nefolalebe amoli dahila nelo mugabe busa Saidani amo gaulahilä, nulo söage igi gadoi ei salobage neebe oeabo gadoi dibeami amolia sadia idogoso. Amo sadia idogoi amoda, sugua ilaba gadoi amole, wäfalä bea sälo amole, sadia idogoi neebea amimu sadia idogoso. Ili yoba gasigige, se naha namolöi namolömelä.

Edefademalä gudila wagamolö

¹¹ Na aso, beahaleamelebe, beaha aligilo filo falei edefade dibe amoge, afädä amodaia sebe amoge meli. Naga föige mu giwige ebalä fisäla moholöi asi amo, na bu made melimelä.

¹² Na beahamelebe, udia dolö ei säloge, ei sälo madege, dafidi baagoi amoli, beaha aligilo filo amoie odagiamadi nowela nefolalebeo. Amida, beba odoa hogala negelahilä, beba elöge hogala negei dibeo. Beba amoligida, udia dolö baagoi nowela nefolalebe amolia dafidi hamosa nelo amo beba amoligi dädäla negei dibe amo gadola, ili mogesio. Beba elö amoda, namolöi namolö beba gabio.

¹³ Ödä duhulugi baagoi amolige, nowela mafula aliligisio. Baagoia amilage, uguli mosöa amilage, baagoi amoli maaha maadesio. Amala hamose-

begi, ili hido hīdolaēa hamosa nelo amo gadola, gudila mogesio.

¹⁴ Amalahilā, baagoge, uguli mosöge, nulo söa oeabo gadoi dibeā ami sadia idogosio. Oeabo gadoi wisa neebe amoda, agedu baagomolö amoie gabio.

¹⁵ Afädēie ēi namolöi namolö bebagi dēdēla negei made beaseda, eda nulo söa oeabo gadoi dibeā ami sogobala sadia idogosio.

Godea nelebo sulubadela gāhe hamoi

21

(Ulufai 21-22)

Mu gāhege naga fōi gāhege bedefala negei

¹ Na aso, beahamu nea beahaleamelebe, mu giwi gāhege, naga fōi gāhege dibeo. Mu dafidi dilo amoge, naga fōi dafidi dilo amoge, hogosa helesa maadela, ödā duhuluge, maade gabio.

² Amase, amo gaalu beahamelebe, Godea hīle nafolai gaamu Yalusaleme gāhe amo, selesaia mosöa Gode hī e neebea amila besela galala digaha neebeo. Amo digase amoda, udia dolisāea ie egoa gausiamolöie momadola daiala mulo amo gadoi digasio.

³ Amala digase amo gaalu, beaha aligilo filo dibeā amila, ado afädē gelola sāhalea, Wae! Godeie mosöda, udia dolö nefolalebe amolibalā nea. Gode eda, ilibalā nea, ilida, ie udia dolö namolömelē. Gode hī eda, ilibalā gedola nea, eda ilile Gode namolömelē.

⁴ Eada ilile siaholö hëla digisa maademolömelë. Baagomolöge, gualömolöge, diimolöge, sëmolöge, dofä made bimolömelë. Mida, nelebo dafidi dilo amolida, hogosa helesa maadeimelëla säσιο.

⁵ Amasebegi, beaha aligilo filodaia sulo amea sähalea, Bimo. Na hä, walio nelebo sulubadela bedefala, gähemu hamosamelëla sälahilä, ea nema sähalea, Ado goweda dofämelë. Dofä gabula helësëmolöi ameada, dëdëmola säσιο.

⁶ Amala sälahilä, ea nema sähalea, Nelebo amolida, hä, hamosa maadeimelë. A-ge nihī ne, Ya-ge nihī ne. Mi gäwi amoge nihī ne, wagamolö amoge nihī ne. Afädë ödä haläse amomada, na nihī namolö ilo ödä gü maase amo, bidia made, memalä muäia imolömelë.

⁷ Afädëa nudula salolela baagila awäse amogali, na nelebo gowe ili imolömelë. Neda, ie Gode neëgi, eda, nīe malö namolömelë.

⁸ Gaso, udia dolö bedäla hubabelelo amolige, asigi made besulo amolige, mala nafadefali nafade elö elöla hamolo amolige, udia dolö baagomäia nufidelo amolige, susugu hamolo amolige, amase, golë hamolo amolige, wäfalī gode naaboea hamoi amoma göa nelegelo amolige, wäfalī sälo amolige, nulo söa fedala igi gadoi ëi salobaea wisa neebe oeabo gadoi dibeami namolömelë. Baagomolö ageduda, amomelëla säσιο.

Yonea Yalusaleme gähe meli

⁹ Selesaia fii gifalädalīaea falo gifalädalīagi neala nafadelasilö geloi gifalädalīa hamola wagamolöie nobala gaui amoligi, afädë ne neebea maalahilä

sähalea, Na dima udia dolisä, Sugua Sibi Malöea nimolö amo oledelä, di misiëla säσιο.

¹⁰ Amala säse amo gaalu, Eleloi Gesami e nema salugasisebegi, selesaia fii amea ne neala gaula segebi edefade ga gadogofalidaia ami ifosilahilä, Yalusaleme, gaamu Godea hile nafolai amo, selesaia mosöa Gode neebee amila digaha neebe amo nema olesio.

¹¹ Gaamu amogida, Godeie yo digalo hido elöi amea yo digalasise amola digaha neebee. Ie yo digaloda, hido elöifäli muni edefadea nelo amo gadola yola, igi folomoi ei yasaba, galasi gadoi hahaloifäli amo gadola yo digasio.

¹² Gaamu amoda, yala ilibia edefadea yalala amalela digi gabio. Amoie idi galoda, giwilasi gabio. Idi galo giwilasi amoli dibeaa amida, selesaia fii giwilasi amoli afädë afädëla neebee. Idi galo amoligida, Isilale sosogo giwilasi amolile ei afädë afädëla dädëla negei dibeo.

¹³ Gaamu amoie afo näiädo amogi, idi galo ohodoa ohodoala hamoi gabio. Eso maasido idi galo ohodoa, idomodi amogi ohodoa, elö adomodi amogi ohodoa, biyiduda, eso digasido ohodoala hamoi gabio.

¹⁴ Gaamu amoda igi bobogamu giwilasia dafa negela yalalahilä, igi boboga amolidaiada, Sugua Sibi Malö amoie abosolo dolö giwilasi amolile ei afädë afädëla dädëla negei dibeo.

¹⁵ Selesaia fia nema ado sälo amea gaamu amoge, idi galo amolige, yala amoge dofemolöie, dofe melëlo i gili gadoi goloea hamoi gaula neebee.

¹⁶ Gaamu amoie gaisafufu dofege, mogo dofege, hele afädëdi gabio. Selesaia fii amea i gili gadoi

gaui amea gaamu amo dofela beahamelebe, sedadeiege, gaisafufu dofeiege, adadiiege, hili afädëdimu, gilomida dausini äudäie hädali äudä gadoi dofesio.*

¹⁷ Aso, ea gaamu amoie yala amo dofe beahamelebe, mida nabülasi gafeiaie odoi bia gabio. Selesaia fia dofese amoda, dolöea dofelo amo gadola wäla dofesio.*

¹⁸ Gaamu amoie yalada, igi folomoi ei yasabaea yalala amalela, gaamu amo goloeamu hamolahilä, golo amoda, galasi hahalo i hido eloi amo gadoia hamoi gabio.

¹⁹ Gaamu amoie yala dafa igi boboga amoligi, igi eloi muni edefadea nelo elö elölaea momadoi gabio. Igi eloi amolile eida gowe ili. Ageda, igi folomoi ei yasaba, ageduda, igi ei safaia, osodada, igi ei agede, biyiduda, igi i bäu gadoi ei emelalo,

²⁰ amase, biida, igi bei adeba falei ei sadonegisi, gafeda, igi bei ei ganeliana, gifalädalüda, igi folomoi ei galisolaidi, gödöda, igi i bäu gadoi ei belili, amase, sөгëda, igi folomoi ei dobasa, nabüda, igi i bäu gadoi ei galisobalasi, gidäda, igi yabui ei haiasini, giwida, igi bei ei amedisi. Amoli sulubadelaea yala dafa amogi momadola amalela negei gabio.

²¹ Idi galo giwilasi amolida, bageie isogi helebe näia momadoi hedabi amo gadoi helebe näia

* **21:16:** Ili Giligi adoea *sidadia* dädësaleada, *sidadia* dausini giwilasi (12,000) egowe dädëida, nilile gilomida gadoida, dausini äudäie hädali äudä (2,200). * **21:17:** Giligi adoeada, mida nabülasi gafeiaie odoi bia dofeila säi amoda, yala mogo adadi amoie helësëla säiledu, ma, yala amoie gaisafufu helësëla säiledu. Nilia dawa mademelë.

boboga giwilasi amea hamoi gabio. Idi galo afädë afädëlada, helebe näia hodo afädë afädëlaea hamoi gabio. Amase, gaamu amogi aulo idi dibe amoda, goloeamu hamolahilä, golo amoda, galasi hahaloi hïdo elöi amo gadoiamu hamoi gabio.

²² Gaamu amogida, na Godeïe mosö afädë made meli. Made meli amoïe mida, Dafidilo Geloï Gode, Sulubadelaïe Geloïfalï Geloï neebe amole, Sugua Sibi Malö amolemu gaamu amoïe Godeïe mosö gadoï neebeo.

²³ Godeïe yo digalo amea gaamu amo yo digaha neebe ameage, amase, gaamu amoïe gele wai gadoida, Sugua Sibi Malö amo hï e neebe ameage, gaamu amogida, esoeage aubeage neëmolöi made gabio.

²⁴ Udia dolö fifi asi sefolalebe amoli sulubadelada, gaamu amoïe yo digalo amogi nawesa namolömelë. Nagadaia beaha aligilo gini nefolalebe amolia ilile nelebo hedabi hïdo elöi dibe amoli amimu gaula moholömelë.

²⁵ Gaamu amogi gasi maade ameada, ïe idi galo amolida, yoba made gala, dogä negesimu diamolömelë.

²⁶ Udia dolö fifi asi sefolalebe amolia ilile momado hedabige, nelebo hedabi hïdo elöige, amimu gaula moholömelë.

²⁷ Gasoda, nelebo nigime baai afädëge, mala nafadefalï nafade elö elöla hamola, wäfalï sälo afädëge, gaamu amogi dofä made nogila digamolömelë. Udia dolö ilile ëi Sugua Sibi Malö amoïe namolöi namolö bebägi dëdëla negei nefolalebe amolimu gaamu amogi nogila digamolömelë.

22

Yonea namolö ilo ödäge namolö ilo iige meli

¹ Selesaia fii amea nema bu elö olesalea, namolö ilo ödä ulufala bimolöi galasi hahalogalai gadoi, Godele Sugua Sibi Malölele beaha aligilo filo dibeaa amila besela galala,

² gaamu amogi aulo idi amoë mogogila, awäha neebe amo olesio. Ödä amoë agesu näiadoge näiadoge namolö ilo i neeboo. Gäheo i sulubadelaie aube afädë afädëlagi, i amolia gägä negesamu aligilo gabio. I amolile bäu ameada, udia dolö fifi asi sefolalebe amoli wahimolöie neeboo.

³ Godea habobala nelebo nafadesa maademolöla säi amoli sulubadelada, gaamu amogi dofä made namolö gabio.

Godele Sugua Sibi Malölele beaha aligilo filo gaamu amogi negesegi, ie hamoi hamolasilo nefolalebe amolia ie hamoi hamosamu nea, ie ei gauia adaha namolömelë.

⁴ Iliada ie odagi bimolömelë. Amase, ie ei ilile odagia dädëla negei namolömelë.

⁵ Amida, gasimolö maademelë. Dafidilo Geloia Godea ilima yo digalasimolö ameada, gamali yoeage, eso neëage, ilima yo digamolöi mademelë. Ilida, beaha aligilo gini nea namolöi namolömelë.

Yesu bu moholö ga made

⁶ Selesaia fii amea, aso, nema sähalea, Ado gowe ilida, dofämelë. Dofä gabula helësëmolöi galea. Dafidilo Geloia, bea sälo nefolalo amolile gesamima aligilo Gode amea, ie hamoi hamolasilo nefolalo amolima nelebo aabela besela galamolö

ga made dibe amoli ulufala olemäia, ie selesaia fii afädë fisiga weimelëla säσιο.

⁷ Wae! Ne moholö amoda, hä, ga made gabumelë. Afädëa ado bea säi amoïe, beba gowegi dëdëla negei dibe amea säse amo gadola bëgëla hamosa neebe amoda, obeägisa neamelë.*

⁸ Neda Yone. Ado säse amolige na nabala, nelebo amolige nïe siiage melimelë. Ado säse amoli na nabala, nelebo amoli nïe siia beaha maadelahilä, nema nelebo olelo selesaia fii amoïe emo mia gumusula dia digalahilä, e ilibiadelä hamosebegi,

⁹ ea nema sähalea, A! Amala hamomabio. Neda, dibaläge, didoolali bea sälo nefolalebe amolibaläge, udia dolö sulubadelaea beba gowegi ado säla dëdëla negei dibe amo gadola bëgëla hamosa nefolalebe dilibalä, hamoi gaalu afädëdi hamolasilo neawe. Gode emu ilibiamalola säσιο.

¹⁰ Ea aso, nema sähamu nea sähalea, Godea nelebo amoli hamomolö segeyo daiai amo ga madesebe ameada, ado bea säi amoïe, beba gowegi dëdëla negei dibe amolida, dia musügä negemabio.

¹¹ Afädëa nafade hamosa neebe amoda, nafade hahamola awäha namialo. Afädëa nigime baai mala hamosa neebe amoda, nigime baai mala hahamola awäha namialo. Amase, afädëa mala mogoi hamosa neebe amoda, mala mogoi hahamola awäha namialo. Gode hï memelelahilä, eleloi hïle neebe amoda, eleloi amo wälasi nami-alola säσιο.

¹² Wae! Ne moholö amoda, hä, ga made gabumelë. Na bidi gaula maase amoda, udia

* 22:7: Damo 7 egoweda, Yesu hï säi dialea.

dolö hïdo hïdolaea hamoi hamoi amo gadola, bidi ïmolömelë.

¹³ A-ge nihï ne, Ya-ge nihï ne. Dafidilage ne nea, hobealage ne nea. Mi gäwi amoge nihï ne, wagamolö amoge nihï ne.*

¹⁴ Amaimo, udia dolö ilile fagulo sedade nigime hësa nefolalebe amolia, obeägisa nea. Amala hësa nefolalebe ameadä, ilima namolö ilo i amoïe gägä faila molöïe geloi ïasegi, gaamu amoïe idi galo difolalebe amogi nogila digamolöi bimolömelë.

¹⁵ Udia dolö mala nafade hïdo elöla hamolo amolige, golë hamolo amolige, susugu hamolo amolige, udia dolö baagomäia nufidelo amolige, amase, wäfalï gode naaboea hamoi amoma göa nelegelo amolige, wäfalï sämolömu hamela wäfalï sälo amoli sulubadelage, gaamu amoïe yala baagido namolömelë.

¹⁶ Neda Yesu. Na nïe selesaia fii afädë dili neebee fisiga gai amoda, dilia sesi amolima nelebo amoli säla ïmäiaïe mosaloïmelë. Nihï neda, Gini Debidïie yaua mi nefolalo amogila dulu fedai. Neda Debidïie malömelë. Neda sege yose gaalu gasumili dagäsiögöla hïdo elöi neë melëlo amo neawemelëla säsiö.

¹⁷ Eleloi Gesamile, Sugua Sibi Malöea udia nimolö amolea sähalea, Di misiëla säsebe. Amase, ado gowe ili nabase ameage, Di misiëla sämo. Di nowë ödä haläha neebe amoda, misië. Amase, namolö ilo ödä amo molö helësësa neebe amoda, di memalä molö misië.

Beba gowegi ado säi nabase udia dolö amolima Yonea ado geloi säla ï

* **22:13:** Damo 12-13 egoweleda, Yesu hï säi dialea.

¹⁸ Ado bea sāla beba gowegi dēdēla negei nabase udia dolō sulubadelama, na ado gowe ulufala sāsisago. Ado sāla negei dibe gowegi, afādēa sāla baaseda, Godea neala nafadelasilo geloi beba gowegi sāla negei dibe amo gadola, ema baala īmolōmelē.

¹⁹ Amase, ado bea sāla beba gowegi dēdēla negei dibe amogi, afādēa neadigiseda, namolō ilo i gāgāge, gaamu Godea hīle nafolai amoge, beba gowegi sāla dēdēla negei dibe amo gadola, Godea nelebo egali mogela īmolō negei dilo amo, haila fisimolōmelē.

²⁰ Ado amoli dibe amo dofā dialeala sāla ulufalo amea sāhalea, Ä. Ne moholō amoda, ga made gabumelēla sāsio.

Dofā amala hamomāiamelē. Dafidilo Geloi Yesu-o, di misiē.

²¹ Dafidilo Geloi Yesuīe ugila negelasilo amo udia dolō sulubadelabalā diamiāiamelē.

Hā amo.

Edolo Bible
Ruth and the New Testament in the Edolo Language of
Papua New Guinea
Sampela hap Buk Baibel long tokples Edolo long
Niugini

copyright © 2010-2022 Wycliffe Bible Translators, Inc.

Language: Edolo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-27

PDF generated using Haiola and XeLaTeX on 27 Nov 2025 from source files dated 27 Nov 2025

688323a7-0b01-555d-b52f-07c624ea681b